

HO LEMA SEFATE SA MORARA

LE HO SE LEMA HOKAE



Re na le lintho tse ngata, empa U tseba lipelo tsa rona le ho tseba tsohle tseo re li hlokang. Re thabile haholo hore ebe re ka e tlisa ho Uena ka thapelo, re tseba hore U a utloisisa 'me u tla re fa molemo oa Hau; ha se hobane re loketsoe ke hona, empa hobane U re tšepisitse eona. Ke na le bonnete ba hore likopo li ngata ka kerekeng hoseng hona, bakeng sa maloetse le bahloki. 'Me ka boikokobetso re ba tlisa ho Uena hona joale, re kopa mohau oa Hau o mosa le matla a pholiso, ho e mong le e mong oa bona.

² Re boetse re rapella hlapohelo le ba sa khonang ho ea kerekeng hoseng hona. Hape, bakeng sa ba bangata ba phuthehileng mona hona joale. Ba bangata baa kula ebile baa hloka. Re ba bona ka liikokotlelo le ka litulo, le litulo tsa bakuli, 'me ba—ba hloka mohau oa Hau. Re a rapela, Morena, hore U tle u ba fe eona, ka ho khaphatseha. Ba tsoe mona, ba thabile, ba folile ba phetse. Ba bangata ba sa bontšeng mahlomola a bona, empa, koana, bothata ba pelo ekaba bo mothating oa ho ba tsoara, kapa mofetše, kapa letemona le itseng le tšabehang. Re a rapela, Morena, hore a lelekoe hoseng hona. Ba tla tsoa mona, ba thabile, ba phetse.

³ Re tla hopola moshanyana eo e monyenyanane ea—eo ea shoang. Re sa tsoa bolelloa, ke moratuo, ea tšoeroeng ke mofetše 'me o a shoa kajeno, haeba mohau oa Hau u sa atolosetsoe ho ngoana eo. Oho Morena Molimo, hauhela moshanyana eo e monyenyanane. Mo lopolle, Morena; haeba e le ka thato ea Hau e Khethehileng. Re thabetse bopaki ba hae, hore o amohetse Mali a Hau, o bile a kopa ntatae ho mo pata ka bofubelu, ba tle ba tsebe hore o khurumelitsoe ke Mali. Re a U leboha, Morena, ka tumelo e matla hakana ea bahale ba banyenyane, ka ho hatela pele ho ea khahlana le qetello ea bophelo, lipelong tsa bona ba sikarile sefapano, 'me teng ba bontša letšoao la Mali. Haele ntho e ka etsoang, Morena, qenehela moshanyana eo, a phele. Re kopetse ba bang.

⁴ 'Me hape, Morena, re rapella litšebeletso hoseng hona. Ba bang ba teng mona, mohlomong, ba sa U tsebeng joaloka Mopholosi oa bona. Haeba ho le joalo, lena e be letsatsi leo ba U fumanang u le bohlokoa bophelong ba bona, joaloka Mopholosi. Ba hlokang pholiso, ba U fumane u le Mofolisi. Morena, U ke u tle ho mohlanka oa Hau, hoseng hona. A nke ke U fumane u le Moreri. Hoba, re laetsa tsena tsohle ho Uena, re kopa hore U tle

u arabe ka Lebitso la Morena Jesu. Amen.

⁵ Ka mehla re thabela ho kena tlung ea Morena, le Phuthehong ea Letsibolo. 'Me 'na, ka tloaelo, ke morao nakong. Ke ne ke sa nahane hore ke tla fihla mona, haese ha nka hichi-haeka. Ona ke motlae o motle ho mohatsa ka. O lutse ka mona, kae-kae. O tsamaile hoseng hona, 'me ke ne ke le mokatong o katlase phaposing ke ntse ke thuisa ke bala. 'Me a re, "Ke tšoere linotlolo, Billy." 'Me ka fumana, a tšoere linotlolo tsa karache, le hona. Ke sa khone ho kena. Ka ba le nako e thata.

⁶ 'Me ka mor'a nakoana, Billy a nkhopola, 'me a re, "Kea ipotsa hobane'ng a eso tle." 'Me a mpitsa.

⁷ Ka re, "U tle kapele." Ka re, "Hobane ha ke na mokhoa oa ho theohela kerekeng." Ka hona re a . . . Ke thabetse ho ba mona. Kahoo, ke morao nakong.

⁸ Empa, u a tseba, ha re kena selikeng se seng seo, moo nako e seng e le sieo, re qala re lebala ka nako. Tsohle li nyamella Bosafeleng, 'me nako ha esale teng. Ha ho moeli oa nako.

⁹ Pauluse o tlamehile a be a ile a nahana ntho e kang eo mohopolong oa hae, bosiu mohla a rerileng bosiu bohle. Moshanyana a oela mohahong 'me a shoa. 'Me Pauluse a robatsa 'mele oa hae holim'a moshanyana, 'me bophelo ba boela ba khutlela ho moshanyana.

¹⁰ Kea kholoa ke boleetsoe, ke molisa, hona joale, hore ba na le leseanyana ba batlang ho le khethela hoseng hona. Kahoo ha 'mè a ka tlisa mothoana, hona joale feela, re tla mo hlahisa ho Morena, e motona kapa e motšehali, e ka bang eng. 'Me ke rata litšebelsetso tsa khethelo. Na u ka tla pele, Moena Neville?

¹¹ Lumela, khaitsetli. Lebitso la ngoana e monyenyanane ke mang? [Khaitsetli o re, "Frank Wayne Dabney."—Mohl.] Frank Wayne Dabney. Ha u amane le Robert Dabney, na ho joalo? Frank Wayne Dabney, o lilemo li kae? ["Liveke tse robeli."] Liveke tse robeli. Ha eso qete nako e kaalo lefatšeng lena le sehlōhō. Be, ke tholoana ea kopano ea lona. 'Me joale u batla ho mo hlahisa pel'a Molimo, e tle e be mohlanka oa Hae. Na ho joalo, khaitsetli? Molimo a u hlohonolofatse.

¹² Be, ke tšoere letlotlo mona, le letle haholo. Shebang seo feela, Frank Dabney e monyenyanane.

Ha re rapeleng.

¹³ Ntate ea Maholimong ea ratehang, mehleng ea ho tsamaea ha Hau lefatšeng mona, ka sebopeho sa motho, ea bitsoang Morena Jesu, ba tlisitse ho Uena bana ba banyenyane. 'Me Ua bea matsoho a Hau holim'a bona, le ho ba hlohonolofatsa, le ho re, "Lesang ba banyenyane ba tle ho 'Na, 'me le se ke la ba thibela, hobane 'Muso ke oa ba joaloka bona." 'Mè enoa o nehela matsohong a ka, hoseng hona, moshanyana enoa, eo ke mo hlahisang ho Uena. Ho rapela, Morena, hore U tle u

hlohonolofatse thakanyana leo. Hlohonolofatsa lehae la ha'bo. A holisetsoe lelapeng la Bokreste. Tšabong ea Molimo, a ke a holisetsoe teng. 'Me ha hosasane ho le teng, a ke a rere Evangeli haeba e baletsoe ke Uena. Mo fe bophelo bo bolelele, bo phetseng hantle. Hlohonolofatsa batsoali ba hae. Ntho e 'ngoe le e 'ngoe e molemo eo U e tšepisitseng, e lule holim'a moshanyana enoa e monyenyanane. 'Mè o mo hlahisitse matsohong a rona, re le baholo ba kereke. 'Me joale re mo hlahisa ho Uena. Ka Lebitso la Jesu Kreste, U hlohonolofatse ngoana enoa. Amen.

Molimo a u hlohonolofatse, Frank e monyenyanane. Ke nahana hore ba mosa haholo!

¹⁴ Ke ne ke loketse ho ba rapella ha ke e-na le tlolo. . . ? . . . Re na le lisakatuku tse 'maloa ho tla rapelloa, empa nka mpa ka etsa hoo hoba re qale ho rapella bakuli, 'me ho fihla tlolo bakeng sa tšebeletso. Joale molemo ho rona ekaba ho ba rapella ka nako eo.

¹⁵ Ke thabela ho bona metsoalle ea ka e mengata ka hare. Ke lumela hore ke bona Moena Charlie Cox morao mane ka kopanong. 'Me hape ke bona Moena John O'Bannon, ho tsoa Louisville. Le metsoalle e meng e mengata, ka mathoko, eo ke—ke e hopolang. 'Me ka hona re thabela ho ba le lona ka hare, ho phutheha le rona hoseng hona, ho sebeletsa Morena.

¹⁶ Joale re lebeletse, kamora nakoana, ho qala tsoseletso mona matsatsi a 'maloa. Re rapella sepheo sena. Ke utloa hore hadeba Molimo a sa tlise tsoseletso, kapa ho e besa lipelong tsa rōna, joale tsoseletso e tla be e le boiteko ba rōna. 'Me ha re ka ema, 'me A utloa e le nako ea tsoseletso, ebe moo A hatellang seo pelong tsa rona, ke moo re ikutloang ho ba le tsoseletso.

¹⁷ Motsoalle e mong ea lutseng mona, ntate le 'mè oa Moena Wood, le e mong oa literaseti tsa rona mona kerekeng. Re thabetse ho ba le bona hoseng hona.

¹⁸ Le ho theosa ka seterata, maobane, thaka le neng le lula mona motseng, e le mothoana ea khohlahetseng. 'Me ke mo ratile kamehla, homme moshanyana ea lokileng. 'Me mohatsa ka o ne a lula haufi le bona. 'Me e batla e le sebini sa mofuta, le seletsi. 'Me o ne a lula mono 'me a tila ka leoto la hae, a roetse katiba e kholo ea molisa oa likhomo, le katara ea sakha. Empa o ne a sebetsa WPA. 'Me ntho ea etsahala tsatsi le leng, e ileng ea nkhopotsa kamehla, kapa ea lula kelellong ea ka, ke rialo, nako e telele. Ha e a ka ea tloha. A na le bana ba 'maloa ba banyenyane; mosali ea ratehang. Ba futsanehile joaloka rona bohle.

¹⁹ 'Me ka bona, ho eme setepising, ho fotsoe, ho emetsoe cheke eo ea WPA ho fihla. Monna oa poso a nyoloha ka seterata. Ba ne ba thabile haholo. Letsatsi le hlahlamang e ne e le Paseka. Ba tla fumana lipompong tsa Paseka kapa ho hong, ka nako ha cheke ea ntate e kena. 'Me ha monna oa poso a fihla, a tšoara cheke ea ntate. U bona masoabi lifahlehong tsa bathoana bao, 'me esale e nkhomaretse, masoabi a makalo.

20 Ke batlile ho bona monna eo, ka lilemo. 'Me maobane, ha ke theoha ka seterata, ha ke... 'Na le mohatsa ka re tsoa suphamaketeng, kapa Quaker Maid toropong, ka kopana le mang, sefahleho le sefahleho, haese eena? 'Me e 'ngoe ea lintho tsa pele tseo ba neng ba batlile ho mpoella tsona, e ne e se e le Mokreste. E se e le lilemo a qetetse ho noa. 'Me ke thabetse ho ba le uena, Mongh. Logston, ea lutse setulong se ka pele, mona ka kerekeng, hoseng hona. Ke setho sa kereke ea Moena Junior Cash mane Charlestown, Indiana, moena ea khabane haholo. Ho molemo haholo ho ba Mokreste ho feta kantle mono lefatšeng. Na ha ho joalo? Joale, ke nahana hore o bina mananeong, 'me o letsa 'mino oa hae, tlotlisong ea Morena. Ke khau e 'ngoe ea mohau o hlolang oa Molimo.

21 U ka rata ho ema feela, Mongh. Logston? Ha ke... Monna enoa e kile ea e-ba letahoa. Se seng sa liletsi tsena mona, le a tseba, likatara le lintho. Joale tsohle li sokolletsoe 'Musong oa Molimo, 'me o kantle mona, ho re, "Kea U leboha, ka eona, Morena." Oh, ha..."

22 Ke ne ke bolella Mongh. Wood, maobane. Ka re, "Mohla uena le 'mè, le fihlang mose oane le fumana moaho oa lona, 'me hoseng ho hong e tle re ha le thabile haholo, 'me tlase koana maralleng, ka khohlong, kae-kae, mono ho hahilo e motlotloana, e tla re ha ke tsoela mathuleng, 'me ke fihla ke ema mathuleng, ke tla hooeletsa likhohlong tseo tsohle:

Mohau o makatsang! mololi o monate-nate,
O pholositse ea soto ea kang 'na!
Ke na be ke lahlehile, 'me joale ke fumanoe,
Ke foufetse, empa joale kea bona.

23 Ka bolella Mongh. Wood, ka re, "Be, phathatsa mama lehetleng, ho re, 'Bokang Molimo! Moena Branham oa khale o phunyelelitse. Ke eo, tlase mane ka motlotloaneng mono.'" Ha nka fihla Mono le ka mohla, e tla ba ka mohau o hlolang oa Morena Jesu.

24 Joale re ka inamisa lihlooho tsa rona nakoana pele re phetla Lentsoe.

25 Morena re ntho e kang sehlopha sa bana. Re na le likarolo tsa rona tsa botho, 'me, rona, maikutlo a rona a metlae, bolekanane ba rona 'moho. Joale re tla karolong eo e khethehileng ka ho fetisisa ea tšebeliso efe kapa efe, ho bala Lentsoe le sa tlaileng la Molimo o phelang. Ke tla kopa, Morena, hore U bue ka Lentsoe le leng le le leng. Le ke Le tsoe le ho thopothela lipelong tsa batho, le ho kotula kotulo eo e neng e retetsoe hona. Moea o Halalelang o moholo o kene har'a rona joale, le ho nka Mantsoe ana a tlang ho baloa, le ho re arolela 'ona, ka bonngoe, kamoo re hlokanang kateng. Hoba re e kopa ka Lebitso la Jesu le bakeng sa Hae. Amen.

26 Pesalema ea 80, ke lakatsa ho bala karolo e itseng.

Mamela, oho Molisa oa Iseraele, uena ea tsamaisang Josefa joaloka mohlape; uena . . . lulang pakeng tsa likerubime, hlaha khanyeng ea hau.

Tsosa bonatla ba hau, pontšeng ea Efraime . . . Benjamine le Manasse u tle ho re thusa.

U boele u re ahise, oho Molimo, . . . u khantše sefahleho sa hau; 'me re tla bolokeha.

Oho MORENA Molimo oa makhotla, o tla 'ne u halefe ho isa kae leha sechaba sa hau se ntse se u rapela?

U ba fepa ka bohobe ba meokho; 'me u ba noesa meokho ka tekanyo e kholo.

U re etsa tseko ho moahelani ba rona: lira tsa rona li a re tšeha.

U re busetse, oho Molimo oa makhotla, . . . u khantše sefahleho sa hau; 'me re tla bolokeha.

O ntšitse sefate sa morara Egepeta: oa leleka lichaba, oa se lema.

²⁷ Sehlooho sa ka hoseng hona, ha Morena a se lumella, nakoana feela, e tla ba holim'a: *Ho Lema Sefate Sa Morara Le Ho Se Lema Hokae.*

²⁸ Hoa makatsa kamoo Molimo, libakeng tse ngata, o bapisang batho ba Oona ka litsela tse fapaneng. Ha se khale ha re bua moo O re bapisitseng joaloka ntsu, 'me Eena ka ho ba Ntsu ka Sebele, 'me rona re lintsunyana Hae. 'Me ke tšepa tsohle li tla tsamaea hantle. Lekhetlo la ho qetela ha ke bua ka seo, ka fumana lengolo moo . . . Motse o moholo oo, bongata ba lona le tseba moo e neng e le teng, Ohio, mohla mokhatlo oa bareri o phuthehileng 'moho 'me oa nyatsa litšebeletso tsa ka hobane ke lumela Molimo o bilelitse motho Bophelong Bosafeleng pele lefatše le theoa. 'Me ho ea ka tumelo ea ka, haeba Molimo e le Molimo, e kile ea e-ba Molimo, E sa ntse e le Molimo, 'me esale e le Molimo kamehla. Haeba A sa ntseba pele lefatše le eba teng, e tla be e se Molimo.

²⁹ Bongata ba lona esale le bala mona mapatlelong a lipontšo, le joalo-joalo, ka maikutlo ana a mohlolo. 'Me tse ling tsa tseo, ehlile, li hloentse li khutletse tšebetsong ea ka. Empa, haeba u kile oa ithuta kapa oa lekola thutokhopolotaba, tšōmo: "ntho e kang eona, empa e se joalo."

³⁰ 'Me ka hare ho Mangolo, re fumana Jambrese le Janese ba hanetse Moshe ka ho etsa bonneteng eona ntho eo ba e entseng, ka ho lahlela lere fatše le ho fetoha noha. Moshe a lihela likotlo. Le bona ba lihela likotlo, hape, empa ha ba khona ho tlosa likotlo. Ha ba khona ho folisa, hoba Molimo ke mofolisi a le mong. Empa ba khonne ho hlahisa likotsi, eaba Moshe o a li tlosa. Joale ha fihla makhaolakhang, moo Moshe a entseng hantle seo Molimo o neng o mo laetse ho se etsa.

³¹ 'Me ke a tseba, tsena tsohle tse mathokong, lefatšeng kajeno, qetellong li tla fihlela makhaolakhang a maholo ka tsatsi le leng. Hobane, Bibeletse, "Joaloka ha Janese le Jambrese ba hanyelitse Moshe, le batho bana ba kelello e bolileng, ka nqa Tumelo ba tla e etsa, ho hanyetsa matsatsing a ho qetela, empa boeatla ba bona bo se bo tla bonahala." Ke boprofeta bo tlamehang ho phethahala, 'me u ka bona mahlakore ka bobeli a hlaha joale.

³² Empa Moshe o entse hantle feela seo Molimo a 'moleletseng ho se etsa. A lahlela lere fatše 'me la fetoha noha. 'Me linohe tsena tsa tsoa 'me tsa lahlela mare ea tsona fatše 'me a fetoha noha. Moshe o ne a le qetellong ea bohlae ba hae, le qetellong ea matla a hae.

³³ Empa Molimo o batla ho re fihlisa, ho fihla pheletsong ea tsela ea rona, ebe O a kena. Ke mokhoa oa Hae oo. E ka ba u kula haholo, hoseng hona, ho fihlela ngaka e u tlaleha u ke ke oa phela. Motho ea noelang metsing o ee a phamole le lehlokoana. Ho joalo ha re leka ho fumana. . . . Sohle seo re ka se sebetsang, ka borona, ke botho, re tla se etsa. Empa ha ho fihloa moo tšepo e 'ngoe e leng sieo, bao ba sa lumeleng pholiso e Halalelang ba tla lumela hang-hang. Ke tšepo ea bona feela.

³⁴ 'Me Moshe o ne a fihlile ntlheng ea malebaleba a hae, eaba Molimo o hata o kena 'me oa etsa hore noha ea hae metse noha ea motho e mong. Joale noha ea hae ha e sa hlale e le teng.

³⁵ Joale, bokhoni bo qahameng ba ho bala maikutlo, le thutalitšōmo, le bohle ba sebetsang meea, e reng 'na, pele ke qala sehlooho sa ka, ke le otlollele sena, ka thuso ea Molimo, ha nka khona, liabolose a ka etsa e ke lintho tseo li lokile, empa kamehla li ipaka li sa loka. Joale, ha ba eso katlatse setšoantšo sefe sa meea eo ba e hlalisitseng, hobane ka tšoanelo e ne e le sieo mono.

³⁶ Empa mohla e leng nako ea Molimo ho pakela mahlale, hore E ne e le Molimo, Oa lumella setšoantšo ho nkuoa. E tšoarella ka ho sa eeng kae. Mohlahlobi o itse, "Leseli la phaitse lense. Leseli le ne le hlile le le teng mono. E ne e se saekholoji." Ka hona, le a bona, seo Molimo o se etsang se hlola kamehla.

³⁷ Noha ea Moshe ea metsa noha ea ba bang. 'Me o ne a ka le thonaka letsohong la hae, 'me noha ea bona e ne e le ka hare ho thupa eo. Seo liabolosi a se etsang ke tšōmo. Seo Molimo o se etsang ke 'nete. Ka hona, ke rata ha sena se thopothela lipelong. Ha Molimo o pholosa motho, o bolokehile. U se tšoenyehe ka ho khutlela morao le ka mohla; u ke ke oa khona. Seo Molimo o se etsang ke sa Bosafeleng. Liabolosi a ka u fuluha oa lumela hore u bolokehile. Empa ha Molimo o u pholosa ka 'nete, u e fumane halelele kamoo ho khonehang, hoba u na le Bophelo Bosafeleng. Jesu o boletse joalo.

³⁸ "Ea utloang Mantsoe a Ka, 'me a lumela ho Ea Nthomileng, o na le Bophelo Bosafeleng, 'me a ke ke a tla Kahlolong, empa

o tlohile lefung ho kena Bophelong.” Boo ke Bosafeleng hakaalo ka Molimo ka Sebele, hobane ke Lentsoe la Hae.

³⁹ Molimo ke Molimo o le mong. O ke ke a oa Itsoakanya le lintho tse ling, ha O a arohana. Molimo ke Molimo. Molao oa pele, ke ho re, “U se ke oa ba le melimo e meng ka pel’a Ka.”

⁴⁰ Kahoo u ke ke oa kopanya oli le metsi ’me oa etsa hore li sebetse hantle. E lokela ho ba metsi kapa oli. ’Me Molimo e sa ntse e le ’ona Molimo. Re fumana bolumeli bo itsoakanyang bo re, “Molimo o nong o le teng, o kile oa etsa *sen*a, ’me ha o sa se etsa kajeno,” joale re leka ho kopanya oli le metsi. Hobane, Eena . . .

⁴¹ Lengolo le itse, “E sa le eena maobane, kajeno, le kamehla.” E ke ke ea tsoakana feela le ho se lumele; tumelo e ke ke ea khona.

⁴² Re na le tumelo ho Molimo. Ke ea Bosafeleng. Ho se lumele esale ho le teng, ho tloha tšimong ea Edene. Haesale Molimo o batla hore batho ba Oona ba lumele sena. Esale O batlile hoba ba be le khohiseho, le ho—ho Iponahatsa har’a batho ba Oona. Molimo ke Moea.

⁴³ Ho Santa Johanne khaolo ea 15, temana ea 1, Jesu o itse, “Ke ’na sefate sa Morara; lona le makala.” Joale, lekala le Morara li hokahane ’moho. ’Me kamehla Molimo o lekile ho fumana batho bao O ka lulang ho bona, hore O tle o bontše khanya ea Oona har’a batho ba Oona.

⁴⁴ Joale re bala mona hore Davida o ile hooelets, ’me a re, “Oho Morena Molimo, khutlela ho rona hape. Re entse sebe ’me re U furaletse. Uena Ea lutseng lipakeng tsa aletare le kerubime, khanya hape.” Hoba o tsebile khetlo le leng E ne e le Molimo har’a bona, ’me Davida o tsebile hore E ne e sa ntse e le Molimo. Batho ba ne ba ikarotse ho Eena. Molimo a sa hlale a khanya. E ne e se hobane A ne a sa khone ho khanya. Ke hobane batho ba ikoalla mehauhelo ea Hae, ka sebe sa bona. Joale David o ea mongolong oa rona. Psalame ea 80:7.

⁴⁵ A re, “U ile oa fothola sefate sa morara, Egepet, oa se hlomola ua se hloma setšeng se setle.” Eo e ne e le Iseraele, batho ba Molimo ba neng ba le Egepet. E ne e le sefate sa morara se setle. E ne e le bakhethoa ba Molimo. Empa haeba sefate sa morara se setle se sa lengoa mobung o motle, se ke ke sa beha litholoana tse ntle. Ho itšetlehile ka hore na sefate sa morara se lenngoe hokae, se tla khetholla liphetho tsa sejalo. Ka baka leo, Molimo oa thonaka Iseraele, mobung o nyopileng.

⁴⁶ Ho batla tšoana le kajeno. Rea fumana, naheng, balumeli ba bangata ba baholo le ba khabane, ’me ba tsoakane ka har’a likereke tsohle tsa mekhatlo. Ba tsoa likerekeng tse fapaneng le mafapheng a fapaneng a bophelo. Ke ka hona, tšebetsong ea ka, ha ke eso leke, nako efe feela, ho khethula motho ofe ea itseng kapa mokhatlo ofe feela o itseng, hobane, har’a bona bohle, ho

na le batho ba lokileng. Ke batho ba Molimo ba bitsitsoeng le ba khethiloeng.

⁴⁷ Na u be u ka ahlola Iseraele mehleng ea eona Egepeta? Ba mpa ba tlohile ka leoto le lesele. 'Me libe tsa bona li ne li ba aroletse hole—hole le Molimo, 'me ba lengoa Egepeta.

⁴⁸ Batho bongata ba joalo, likerekeng kajeno, batho ba lokileng ba lenngoeng sebakeng se fosahetseng. Joale haeba molumeli oa sebele a tlisoa ho Krete, 'me a lengoa har'a phutheho e kholo e sa lumeleng mehlolo le meeka le lipontšo tsa Morena, motho eo e ka ba Mokreste oa makhonthe, le Mokatholike, Baptise, Presbeteriene, Paki ea Jehova, ntho e 'ngoe. Kerekeng eo, Morara oa makhonthe oa Molimo, empa tumeloana ea mokhatlo e khaola Bophelo ba Morara oo. Ha o khone ho beha litholoana tsa Oona.

⁴⁹ 'Me, hangata, litholoana life tseo u li fumanang sefateng sa morara se khokhofaneng kapa se seng mobung o motle ke litholoana tse mpe. E tla hlaha joalo ka liapole, e ntano fineha lefito le ho jeoa ke liseli. E fetoha letsaba la likokoanyana tsohle.

⁵⁰ Sefate sa morara se koenneng ha se hloke ho nyanyatsoa. Se phetse hantle ho leleka lira tsohle tsa sona.

⁵¹ Ho joalo le ka Mokreste ea tsoetsoeng labobeli. Ha u a tlameha ho ba nyanyatsa ka linako tsohle, le ho ba phathatsa mokokotlong. Ba koenne ho lekaneng moeeng ho qhela mahlabisa-lihlong 'ohle a lefatše. Ba phela ka phepo ea 'nete.

⁵² Sefate ka nako e 'ngoe, se . . . kapa semela se tsoang linqalong tsa mahoatata, 'me se hloka mongobo o lekaneng ho iphelisa, se tla bea tholoana e boseberoana, 'me ha e shebahale joaloka tholoana e lokelang ho tsoa sefateng morara oo.

⁵³ Moena oa ka, khaitseli, ke seo likereke li leng sona kajeno. Moetsalibe o a kena, ka mora moo, mohlomong, lapeng o kena tlas'a tsuo, o a tloha a bale Bibehe ea hae, 'me a ee kerekeng. Sebakeng sa ho fumana liapole tsa litonana tse mathemaloli kapa merara, Bophelo ba Morena Jesu bo hlahisoang bocha ka Kerekeng, o fumana menahanonyana, e mafito, e jeloeng ke liboko, ea phutheho ea bolumeli, e menyenyane. "Rona Mabaptise, re e fumane. Ha *ba* na eona. Rona Mamethodise, re e fumane." Matsoho a Molimo atoloselitsoe leoatleng le leng ho ea ho le leng, le ho tloha lebōpong ho ea lebōpong, a ka pholosa ka ho fetisisa. Empa ke seo re se fumanang libakeng tseo re kenang ho tsona.

⁵⁴ Ho joalo ka ha Davida le eena a boletse, hape, ho Lipesaleme 1. A re, "Ho lehlohonolo motho ea sa keneng mokhatlong oa basomi bana le batho ba khopo, a sa itsoake le bona, a sa lule setulong le bona. Ua tseba, basomi ba reng, 'Matsatsi a mehlolo a fetile.' Me kolobetso ea Moea o Halalelang ke boikaketsi feela.' Ho lehlohonolo motho ea sa tl'o etsa hoo. Ho lehlohonolo motho ea tla emella thokoana le tse joalo. Ha ba batle kopanya ntho tseo

'moho. 'Me u ke ke oa kopanya lintho tseo 'moho. Ho lehlohonolo motho ea sa phutheheleng le e 'ngoe ea lintho tseo tse latolang Matla a Morena."

⁵⁵ Bible e boletse, "Tsoang har'a ba joalo, hobane letsatsi le a tla leo ka lona ba tla ba lihlooho-thata, baikhohomosi, ba ratang menate ea nama ho feta ba ratang Molimo; ba nang le sebopheo sa borapeli, ba mpa ba latola Matla a jona: le ba joalo u ba furalle."

⁵⁶ "Ho lehlohonolo motho ea sa ikopanyeng le basomi bao, ba nyatsang, ho bitsa Kereke ea 'nete, 'sehlopha sa bacheseheli ba feteletseng.' O tla ba joaloka sefate se lemiloeng pel'a linōka tsa metsi." Molimo o mo behile sebakeng se khethehileng. "Litholoana tsa hae li ke tsa pona. O tla hlahisa mahlaku a hae le litholoana tsa hae sehlang." Hlokomelang kamoo Davida a qhoaetseng mantsoe ao. "Monna enoa o lehlohonolo. O tla lengoa," e seng ho hlangoa feela. U a tseba, ke rata ho bona ntho efe feela e lenngoeng.

⁵⁷ Joale, Iseraele, Egepeta, e ne e sa lengoa. Ba ne ba hlonngoe feela. E ne e se mobu oa lehae la bona la mantlha. 'Me monna eo e leng Mokreste, ea theileng pheletso ea hae ea Bosafeleng holim'a tumeloana e itseng ea mokhatlo, ha a setšeng sa hae se nepahetseng. O tsoaletsoe ho lokoloha, le ngoana oa Molimo, ho rapela Molimo. Empa o tlas'a tumeloana, ha a khone ho beha tholoana ea hae, koana ntho e ka ho eena e labalabela ho e etsa.

⁵⁸ "O tla ba joaloka sefate se lenngoeng pel'a linoka tsa metsi." Linoka, bongata; metsi, bonngoe. Linōka tse ngata tse kenang mocheng o le mong. Ka mantsoe a mang, o tla tšoana le monna oa Lengolo, ea lumelang Lentsoe lohle la Molimo, moo Matla le lineo tse robong tsa moea li ka phallang, ka Molimo o le mong, ho kena botebong ba hae.

⁵⁹ Batho ha ba lumele ho hooeletsa. Taba ke hore, ha ba na thabo ea moea. 'Me thabo ea metsi a Bophelo e ka phalla. Haholo ke eona taba mabapi le Branham Tabernacle, hobane ho se lumele, lipelaelo tsa lefatše li tlamile batho ho fihlela ba sitoa ho beha kholo ea moea.

⁶⁰ Ke bona bothata ka sechaba sa rona. Ke eona taba ka likereke tsa rona. Ha ba na thabo. 'Me thabo ea Morena e tlohile. Joalokaha ho kile ha ngoloa Lengolong, lentsoe la Seheberu la Ikabode, ho bolelang, "Boteng ba Morena bo tlohile." Hoo ho holim'a likereke tsa rona, hobane re hlobohile motheo oa mantlha, 'me ra ithloma har'a litumeloana le phutheho ea bolumeli, 'me ra lumella lintho tsa lefatše ho omisa boiphihlelo ba rona le Molimo khere.

⁶¹ Oh, e-eang le 'na Arizona. E re ke le ise mahoatateng, ao ke sollotseng ka lilemo tse ngata ho ona. Ntho e 'ngoe le e 'ngoe e lehoatateng e e hlaba. Semelanyana sefe seo u se atamelang, u se ke ua se atamela, se tla u hlaba. Se lula se tletse lihlabahlane

hantle, se ikemiselitse ho hlaba eng e se atamelang. Bothata ke bofe? Se entsoe tšehlo ke'ng? Ke ho hloka metsi. Ke eona ntho e se omisitseng. Tšehlo eo ke lehlaku, le rarehileng. Ka baka la khaello ea metsi, le fetoha tšehlo.

⁶² Ho joalo le ka Kereke, kajeno, ha kereke e tloha Selibeng sa Bophelo. Ha e tloha thabong ea pholoho, ha e tloha ho Morena Molimo, joale motho eo o fetoha tšehlo, kamehla o fumana phoso, o a hlaba. Hang ha u fihla, “Ke Mopresbyteriene. Ke Momethodise. Ke *hore-le-hore*. U se ke ua bua le 'na ka nyee tseo.” Tšehlo! Ha e na litholoana.

⁶³ U ka nka sona semela seo, lekhala, 'me u se behe naheng meloko e seng mekae, metsing a mangata, 'me tšehlo eo e tla raroloha 'me ho tla hlaha lehlaku le bonolo, le behang tholoana.

⁶⁴ Molato ke ofe ka kereke kajeno? E beiloe ka har'a phutheho ea bolumeli, e hlomileng litumeloana tsa mokhatlo le ho e tlama, ha ho thabo, ke lefatsane feela nako le nako, la tsoseletsonyana ho e tšoara. Seo e hlokanang ho ba sona, ke ho tsoa har'a basomi le ba sa lumelang, le ho lengoa pel'a linoka tsa metsi.

Hobane ho na le Seliba se tletseng Mali,
A montsoeng metsong oa Emmanuele,
Ba'libe, (ba sa lumeleng) ba qoelang leqhubung
leo,
Ba lahla sekoli sa bona sa molato.

⁶⁵ “Sefate,” Davida o itse, “se lenngoeng pel'a linoka tsa metsi.” Oh! Molimo a ke ke a phalla ka Boena ka har'a lekhala.

⁶⁶ Joale, metsi a emetse bophelo. Rea tseba hore Moshe, lefeelleng, o tllile Lefika, 'me la nehela metsi a bophelo ho batho ba timelang. 'Me Jesu o itse, “Joaloka ha Moshe a otlile lefika lefeelleng, Mor'a motho o tla phahamisoa joalo,” 'me o ile A otloa.

⁶⁷ Bophelo bo ka har'a sele ea mali. 'Me Bophelo boo bo ke ke ba hlaha ho fihlela sele ea Mali e sitisoa 'me e khaoloa.

⁶⁸ Mohla Molimo o nong o ntša Iseraele, Oa ba fetisa tekong, joalo ka sechaba. Oa ba fothola Egepeta, har'a ba sa lumeleng. 'Me oa ba beha tlas'a tlhokomelo ea Hae e mosa, holim'a mapheo a ntsu, ntsu eo e kholo, Moshe, ea ba tsamaisitseng ho tloha sebakeng ho ea sebakeng, ho leka ho ba kenya maemong, ho tšela. Ka lilemo tse mashome a mane Oa ba etella pele 'me oa ba fepa lefeelleng. 'Me Oa nontša lefatše, mobu o motle, mobu o khethuoeng. 'Me Oa bontša mohlolo oa Hae, mehlolo le meeka, ka lilemo tse mashome a mane lehoatateng. O hlahisitse meeka le mehlolo, ka moporofeta enoa, ho bontša hore E ne e le Molimo. Ke mang ea ka omisang leoatle haese Eena? Ke mang ea ka otlang Egepeta haese Eena? Ke mang itetileng sefuba ho phahamisa letsoho haese Eena? Empa, ka har'a tsona tsohle, E ne e le Molimo, 'me Oa Ipontša e le Molimo. Ruri O ne o batlile hore batho ba Oona ba etse joalo.

69 Eaba Oa kolobisa lefatše la Palestina, ka mali a lipoli le lithole, lipoho, linku. Empa sechaba sa hana ho ema. E ne e sa lekana, hobane bophelo ba poho . . . Sele ea mali e ile ea taboloa, 'me bophelo ba phoofolo ba khutla, bo ke ke ba nyallana le bophelo ba motho.

70 Ka tsatsi le leng, Molimo o ne o ikemiselitse hore O tla pholosa batho ba Hae, Kereke ea Hae e neng e reroepele. O ne a loketse ho e etsa, ka Sebele, hobane O ne o e rere pele lefatše le theoa.

71 Motho ke mohlolehi, 'me o tla lula a le joalo kamehla. O hlohile, le ho qaleng, 'me o tla lula e le mohlolehi.

72 Molimo, boitherelong ba Oona, mohopolong oa Oona ka Sebele o se nang moeli, oa rera leano la ho hloma Morara oa sebele fatše. 'Me Oa lema holim'a lefatše lena, Morara, Morara o lokileng; e seng phutheho ea bodumeli, e seng kereke, e seng tumeloana, empa Monna, ka Sebele, ea entsoeng nama. 'Me Oa bonahatsa khotso ea Hae, Matla a Hae, Lengeloi le leholo la Molimo. Jehova e moholo a e-na le Eena. 'Me ka ho Eena ho ahile botlalo ba BoMolimo ka 'mele. 'Me batho ha ba ka ba Mo lumela; le ho se Mo lumele hobane A ne a sa sebelisane le tumelo ea bona.

73 Qetellong, ba Mo isa Kalvari. Teng sele eo ea Mali ea haholoa, ea Mora ea ratehang oa Molimo, 'Mele oo Jehova a neng a phela ka ho 'ona. Ha fihla sefate sa Morara, metso ea Sona e le Khanyeng, le makala a Sona a le lefatšeng, ho hlhisa Kereke ea Molimo o phelang, e tlang ho bontša tsoho ea Hae le Matla a Hae. Ke bafeng banna bana le basali ba ka latolang Kereke eo, Morara oa Molimo o phelang? Boteng bo sa hloheng ba Morena Jesu le Kereke ea Hae, ho phela, le ho bonahatsa makala a Hae a neng a reroe pele, ao A neng a tšoere pele ho theoa lefatše. 'Me oa hlapanya, ka bao, hore O tla ba tsosa. 'Me Kereke ea Hae, kajeno, e na le khanya ea tsoho ea Hae e phelang ka ho Eona! "Ke 'na sefate sa Morara; lona le makala." Nako le nako ha pelo e otlala, mali a futha a kena sethong se seng le se seng sa 'mele. Nako le nako ha pelo e tšepelang ea Molimo e otlala, e futhisa Lebitso la Jesu Krete, ho Kereke, "Eng eo le e kopang ka Lebitso la Ka, Ke tla e etsa. Ke na le lona kamehla, ho isa bofelong ba lefatše."

74 Ha ho makatse ha Petrose a boletse, ka Letsatsi la Pentekosta, "Bakang, e mong le e mong oa lona, le kolobetsoe ka Lebitso la Jesu Krete tsoarelong ea libe tsa lona, 'me le tla tlatsoa ka Bophelo bo tsoang Morareng." Moea o Halalelang o hlhisa Lebitso la Hae, hore haeba re hokahane le Eena, O hokahane le Molimo, hobane E ne e le Motso le Lehlomla la Molimo.

75 O tlile lefatšeng. "Lefatše le entsoe ke Eena. O tlile lefatšeng; 'me lefatše ha le a ka la Mo tseba."

76 'Me joale, kajeno, Eena, ka mora ho shoa ha Hae, ho nehela sele ea Mali, ho shatla, hore ka Mali a Jesu Krete Kereke e

tle e halaletsoe le ho hlekoa ka taolo. Hoo, Moea o Halalelang o moholo, e leng Bophelo ba Morara, Bophelo Bosafeleng ba Morara, hore Moea o Halalelang oo o tle o futhe ka har'a setho se seng le se seng sa Kereke ea Molimo o phelang.

⁷⁷ Ha ho makatse e le batho ba mokhelo le mesollane. Ha ho makatse ha ba itšoere ka ho makatsang. Ha ba sa na litaba tsa lefatše lena, hoba ba shoele 'me ba patuoe ka ho Krete, 'me ba tsoselitsoe bophelong bo bocha, hore e be lithakangoaha tse tla thabela tsoho ea moea, hore Moea o Halalelang o phalle har'a setho se seng le se seng, le ho bonahatsa khanya ea Molimo, joaloka ha Molimo o bontšitse Egepete mohla O neng o hlahisa Morara.

⁷⁸ Joale, morara o hlaha o teng. Bible e bua ka 'ona ho Marena a Bobeli. 'Me na le hlokometse, mohla moreri enoa a tsoileng ho kha dierekisi, o ile a khola morara o hlaha. Merara eo e hlaha e tlameha ho hola haufi le seminare kae-kae, hoba e ne e le sekolo sa baporofeta. 'Me a khola lishoba tse tlang mafara a hae. A a lahlela ka ketleleng, 'me a leka ho a tsoaka le sejo sa mannete, sa makhonthe. 'Me ba hooa, "Lefu le ka pitseng."

⁷⁹ Moena, ho na le morara o hlaha o metseng, 'me o teetse melaoana hare, phutheho ea bolumeli. 'Me ha o fihla kantle mono, o koalla thabo eohle ea moea. 'Me ntho ea pele le a tseba, sefate seo sa morara se shoele.

⁸⁰ Empa Molimo o ikemiselitse hore morara oa Hae o ke ke oa shoa. Ka baka leo A O fothola, litumeloaneng tseo, le ho O tlatsa ka Moea o Halalelang, le ho O hloma fatše, ka Lebitso la Jesu Krete. Mono Kereke eo e ka futha 'me ea phela, le ho nyakalla, ho utloa Boteng ba Molimo o phelang, ho Mo bona a tsamaea le ho etsa lintho tseo A li entseng mehleng ea Hae mona lefatšeng.

⁸¹ Hobaneng? Makala a Hae, khokahano ea Hae, motso oa Hae, qaleho ea Hae, e ne e le Molimo. E ne e le Konyana e hlabiloeng pele lefatše le theoa. Pele lefatše le eba teng, O ne a e-na le Molimo. E ne e le Motso le Lehlomela la Davida, Naleli ea Meso, Khahla ea Phula. O ne a le teng.

⁸² Metso ea Hae e ikharetse ka Molimo, ho pota Terone, ho potoloha 'Muso oa Molimo. Metso ea Hae e haretsoe. Bophelo ba Hae bo ile ba namela lefatšeng. 'Me A nehela Bophelo ba Hae, hore A tle a khutlele metsong le ho futha hape, ho hlahisa makala ho tsoa ho Morara oo, e leng Kereke ea Hae e bontšang liphetho tse tšoanang le tseo A li entseng mohla A ne a le lefatšeng mona, ho Mo etsa Eena maobane, kajeno, le kamehla.

⁸³ Oho Kereke ea Molimo o phelang, lumelang sena, 'Nete! Ke eo moo A leng teng. Ha Moea oa 'nete oa Molimo o tsamaea holim'a molumeli, sohle seo Lengolo le se bolelang, o tla re, "Amen." Hobane'ng? Ke Moea o Halalelang o ngotseng Bible, o leng ka ho eena, o futhisa bophelo ba hae. Ha a tsotelle ea lutseng

haufi, kapa seo motho e mong a se buang. E tla lula e nyallana le Lentsoe.

⁸⁴ Oa leshano o teng. Ke maraka. O tsoa ho morara o hlaha. Ke morara o moholo, o aparetseng lefatše lohle, empa ke lefu. Boholo ba ntho eo bo lahletsoe har'a batho.

⁸⁵ Empa, hopolang, "Phofa" ho o khutlisetsa Bophelong, ho o fothola le ho o hloma nqalong e ntle, e leng Krete Jesu. Seo Lentsoe la Hae le leng sona, Le be "amen," ho uena. Joale Moea oa Molimo, joale, thabo ea moea e tla phalla joaloka noka. "O tla ba joaloka motho, sefate, se lemiloeng pel'a linoka tsa metsi. Mahlaku a sona a ke ke a foforeha. A ke ke a lula mokhatlong oa basomi kapa ba sa lumelang, kapa motho ea se nang borapeli ea phelang ho latela lintho tsa lefatše, empa o tla bea litholoana sehlang sa hae." Tholoana ea mofuta ofe? Haeba u lenngoe ka ho Krete, u tla hlahisa litholoana tsa moea, litholoana tsa Moea o Halalelang. Moea o Halalelang o phela ka ho uena.

⁸⁶ E boletsoe hantle, ke mosali selibeng. Qetellong, re tla bua sena. O itse, mohla a Mo boneng, O ne a shebahala joalo ka monna ea tloaelehleng. Ho ne ho se letho le qoholehang ka Eona, le totobetseng, ke rialo.

⁸⁷ Hobane Lengolo le boletse, "Ha ho botle boo re ka khahlisoang ke bona. Re Mo patetse lifahleho tsa rona."

⁸⁸ 'Me ba etsa ntho e tšoanang le kajeno. Haeba ba sa atlehisoe ke litholoana tsa semoea tsa Moea, haeba ba sa atlehisoe ke lintho tse amanang le Molimo, Krete o mobe ho bona, "Sehlopha sa bahalaleli-bathethehi, sehlopha sa batho ba hlanyang ba seng kelellong ea bona e nepahetseng."

⁸⁹ Empa, ho molumeli, o a E hamarela. Ke Bophelo Bosafeleng. Ha ho letho le ka re arohanyang le lerato la Molimo. Leha e le lefu, kapa hlomoho, kapa tlala, kapa ha ho letho le ka re arohanyang. Re sirelelitsoe ka Bosafeleng matsohong a Hae. Ke rona bao, ha a hamarela sefapano seo.

⁹⁰ Mosali o boletse, mohla. . . O ile a botsa potso, "Na u ka Ntlisetsa metsi?"

⁹¹ A re, "Empa ha se moetlo oa Heno, monna, Mojuda, ho botsa Mosamaria, 'na, potso e joalo."

⁹² A re, "Empa hola u tsebile. . ." Ka mantsoe a mang, tjena, "Hola o tsebile hore u eme haufi le Seliba sa Bophelo hakae, Ke ne ke tla u neha metsi ao u sa tlang ho a kha mona. Ke tla u fothola, uena Mosamaria. Ke tla u tlisa, uena moetsalibe." Eo ke mosalumele, 'me ha a lumele ho Eona. "Haeba feela u ka Ntumella ho u fothola hoseng hona, O itse, Ke tla u lema pel'a linoka tsa metsi. Ke tla u bea malulong, ka kolobetso ea Moea o Halalelang, hore u tle u lumele hoba Lentsoe le leng le le leng leo Ke le buang ke 'Nete. Ha u ka Ntumella ho u fothola, hoseng hona, u tla fetoha lekala le letle. Ha u setho sa tšimo eo ea morara

o hlaha. Sebaka sa hau se ka *mona*, kahoo Ntumelle ho u fothola; le ho u lema ka Lebitso la Ka, pel'a linoka, molatsoana o mong le o mong oa Lentsoe la Molimo. Hobane Lentsoe le leng le le leng la Molimo ke 'nete. Tšepiso e 'ngoe le e 'ngoe e Halalelang ke 'Nete. Ke tla u hloma pel'a linoka tsa metsi a le mang, Molimo a le mong. 'Me u tla beha tholoana, sehlang sa hau. Mahlaku a hau a ke ke a foforeha. 'Me tsohle tseo u li etsang li tla atleha. U tla ema mohla ho seng sebaka se seng ho ema. U tla ema, leha ho le joalo, ka ho tseba hore Molimo o entse tšepiso. E re ke u fothole," A re, "le ho u lema ka mona pel'a Metsi ana, hore uena—ha u a tlameha ho mathela libakeng tsena tsa tumeloana, le libakeng tsa phutheho tsa bolumeli, ho fumana. U ke ke oa E fumana mono, leha ho le joalo. Ere Ke u fothole, pel'a seliba sena sa khale se ommeng mona, sona o tlameha ho kha linkho tsa masenke, le ho reketlisa le ho omana, le ho noa hanyenyane, le ho khutla le ho noa hanyenyane. Ke tla u nea Bophelo Bosafeleng, thabo, joaloka seliba feela, se phallelang Bophelong Bosafeleng. Ntumelle. Ere Ke u etsetse seo," Krete O itsalo ho mosali, moetsalibe.

⁹³ 'Me O bua ntho eona eo ho Kereke hoseng hona. U a tseba hore Molimo o teng. U lumela hore Molimo o teng. Empa bolekaneng ba hau, ntho e u khaotse. U lehoatateng. Ha ho thabo ea moea. U rata ho ikutloa joalo ka bao ka Letsatsi la Pentekosta. Na u ne u ke ke oa rata ho ba le thabo eo ba neng ba e-na le eona?

⁹⁴ Mohla Molimo o neng o tšela Bophelong ba Hae ka hare, ka har'a lekala la pele la sefate, sefate seo se ile sa itšoara joaloka batho ba tahiloeng. Ba thekesela tlas'a tšusumetso ea Moea. Basali ba ratehang, ba halalelang ba kang moroetsana Maria, kantle mono a itšoere eka o tahilo. Oh, o ne a tahilo ke Moea. 'Me a leka ho bua, 'me a sitoa. O ne a le *melomo e kokotletsang*, ho bolelang "e arotsoeng," ke ho koakoetsa, ho leka ho bua ho hong. O ne a tletse Moea haholo, a sitoa ho e bua. "Uh-uh-uh-uh," melomo e kokotletsang. Joale, hang-hang, ka puo e 'ngoe, ba bua.

⁹⁵ 'Me morerinyana e monyenyanane ea sa tsebeng ho lekaneng ho ngola lebitso la hae sekhechaneng sa pampiri, a hlanamisa lebokoso la maiketsetso kapa ntho e 'ngoe, kapa kutu, 'me a qhomela holim'a lona.

⁹⁶ Be, bomosalumele bao ba qala re, "Batho bana ba tahilo. Ke sehlopha seo sa bahalaleli ba thethehang."

⁹⁷ Thakanyana lena la qotsa Lengolo; e seng buka ea tumeloana, empa Lengolo. A re, "Lona banna ba Iseraele, le lona ba ahileng Jerusalema, taba ena e ke e tsejoe ke lona. Hoba batho bana ha ba taho joaloka ha le lekanya, etsoe esale hora ea boraro ea letsatsi. Empa ena ke taba *eane* e boletsoeng ke moporofeta Joele, 'Matsatsing a ho qetela, ho bolela Molimo, Ke tla tšela Moea oa Ka,' ke sona se futhang."

98 Na u ka rata ho fotholoa tumelong ea khale ea mofuta o itseng, le ho beoa pel'a Liliba tsa Bophelo, moo ho leng khotso e kang noka?

99 Lefu, ka bolona, ho moshanyana ea emeng koana, o hometsoe ke mofetše, empa o amohetse Moea o Halalelang. 'Me lingaka li 'molella hore o a shoa. Ntata'e o ile a 'motsa, "Na—na u tšohile?"

100 A re, "Ke malala-a-laotsoe. Ke se ke le malala-a-laotsoe. 'Me ho siea bopaki lefatšeng lena, mpateng ka bofubelu, hoba e tla ba letšoao la hobane Mali a Jesu Krete a nkapesitse."

101 Ke seo A se etsang. Thabo, e kang noka, ho kena ka pel'a lefu, ho tsamaea pontšeng ea lefatše, ho tsamaea har'a meleko, ho ema pel'a baseholli le ho khanya joaloka Lengeloi. Hobaneng? Bophelo ba hau ha se ba hau. U shoele, 'me u patiloe ka Lebitso la Jesu Krete, 'me u tsoelitsoe Bophelong bo bocha. A ka futha a phalla ka uena, lehlohonolo la Hae, le ho hlahisa makala a hokahaneng le Morara. "Ke tla ba beha sebakeng se khethiloeng." Molimo o itse Mora oa Hae e ne e le khetho ea Hae.

102 U kena joang ka ho Krete? Petrose o itseng ka Letsatsi la Pentekonta, mokhoa oa ho kena ho Krete? A re, "Bakang, e mong le e mong oa lona, 'me le kolobetsoe ka Lebitso la Jesu Krete tšoarelong ea libe tsa lona, 'me le tla nka neo ea Moea o Halalelang. Hobane pallo ena e etselitsoe lona, le bana ba lona, le ho ba leng hole kaofela ha bona, le bohle bao Morena Molimo oa rona a tla ba bitsa." Seo se ne se kenyelletsa uena, memo. "Baka, u kolobetsoe ka Lebitso la Jesu Krete tšoarelong ea libe tsa hau. Tšepiso e ho lona."

103 Oh, moena, Moea oa 'nete oa Molimo o tla futha holim'a Hono, ho re, "Hoo ke 'Nete." Shebang maraka ao le morara o hlaha. Empa Moea oa 'nete oa Molimo, ea batlang ho lengoa sebakeng se khethiloeng, moo ho leng litholoana tsa Moea!

104 'Me Jesu o ile a etsang mohlang oo? A re, "Haele moo mosali eo a batla ho amohela seo. . ."

A re, "Morena, mphe Metsi ao. Ke batla Metsi ao."

105 Ho re, "Siea nkho ea hau ea khale e lutse mono. Ha u sa hloka nkho ea mofuta oo hape. Ha u hloke lengolo la hau nqa tumeloana ea hau. Tlohela Presbeteriene ea hau e ikakasang, Baptise, Methodise, Pentekosta, li sale mono. Nyolohela Selibeng mona. 'Me Ke tla u tlatsa ka thabo e tla phalla joaloka noka."

106 Joalokaha mothomotšo oa khale a boletse, "Ke na le khotso e kang noka." E phalla bosiu le motšehare. Pontšeng ea lefu, e phalla ka ho tšoana.

107 Pauluse o itse, "Lefu tsenene ea hau e kae? Le lebitla tlhola ea hau e kae? Empa ho lebohuoe Molimo o re fang tlhola ka Jesu Krete." Ka sebele.

108 A Mo sheba. A qala a bua le Eena ka nqalo ea ho rapela. 'Me A re ho eena, "E-ea lata monna oa hau." ("Ke tla mo tsebisa haeba

Molimo o sa ntse o phela. 'Na ke Morara.") "E-ea lata monna oa hau."

"Hobaneng," a re, "ha ke na monna."

¹⁰⁹ A re, "Ke hantle. U bile le ba bahlano, le eo u lulang le eena hona joale hase monna oa hau."

¹¹⁰ A retoloha. E ne e le eng? Ho hlomathisoa ha hae—ha hae, bophelo ba bophelo ba hae, moo a thefutsoeng teng sefateng sena sa khale sa tumeloana, bo ne bo tsoere, mohla ho futha ha pele ha Molimo ho neng ho kena makaleng a hae.

¹¹¹ "Monghali, ke a lemoha hobane U moporofeta. 'Me ke a tseba Lengolo le boletse Messia a tla fihla 'me O tla etsa ntho ena."

A re, "Ke Eena. Ke Eena."

¹¹² O siile tumeloana eo ea khale e robetse mono. A tloseletsa ka thata kamoo a khonneng, a qala a hasa litaba. "Tloong, le bone Monna Ea mpoleletseng lintho tseo ke li entseng. Na Enoa ha se eena Messia? Messia ke Molimo o tlotsitsoeng. Ho Mo eelloa e le Molimo, Emmanuele moporofeta, Molimo.

"Ke 'na sefate sa Morara. Lona le makala."

¹¹³ A re, "Be, lōna batho, lōna Bajuda le rapela holimo Jerusalem. Le na le kereke e kholo holimo mono, le tumeloana."

A re, "Ke tseba seo."

A re, "Rona re rapela thabeng ena mona."

¹¹⁴ A re, "Ke tseba seo. Empa nako e a tla, 'me le joale e se e fihlile, eo ka eona litumeloana tseo tsa Jerusalem, kapa tumeloana ena ea Mosamaria, e ke keng ea hlola e sebetsa. Hoba Molimo ke Moea, 'me ba O rapelang ba tsoanetse ho O rapela ka Moea le ka 'Nete."

¹¹⁵ Ke leo lekala le tsoereng 'Nete. "Bakang, e mong le e mong oa lona, le kolobetsoe ka Lebitso la Jesu Krete tsoarelong ea sebe sa lona," 'me le tla kopanngoa le lekala. Le tla fumana tsena, ntho e tsoanang, hoba Moea oa Molimo o tla futha ka ho lona, ho tliša ho lona, linoka tsa thabo, khotso, mamello, tumelo, molemo, bonolo, mosa. O tla le neha, ho bopa ho tloha ho . . . Ho tsoa ho phiri, ho u fetola konyana. Ho tsoa ho nonyane, ho fetohela ho leeba. Le a bona? Ke Moea oa Molimo o phelang o fetolang tlhaho ea hau. Joale kena ka ho Eena, 'me u enteloe ka hare le ho fetoha le leng la makala a Hae. Hoba ka letsatsi le leng. . .

¹¹⁶ Thapo ea Bophelo e neng e robetse fatše tjena, ke Bophelo ba Krete, Moea o Halalelang, e hokantsoe le 'Muso oa Molimo. Molimo o tla theoaha ka lekala leo la Bosafeleng, ka tsatsi le leng, 'me bohle ba shoetseng ho Krete O tla ba hlahisa le Eena, ka nako ha A nyolla Sefate hape. Se lemiloeng pel'a linoka tsa Bophelo, moo Sefate sa moremotala se sa poneng kapa Se sa foforeheng mahlaku.

117 Ere Se sa u otlollela lekala hoseng hona, motsoalle oa ka ea ratehang, Se amohele, 'me u fotholoe sebeng sa hau, u fotholoe lipelaelong tsa hau, tumelong ea hau.

118 Ha ke u bolelle ho tlohela kereke ea hau. U lule kerekeng ea hau, empa tloo ho Kreste. Ke phetho. Ha ke tsotelle kereke u e kenang, ha feela u ka fihla Selibeng seo se tletseng Mali.

119 Amohela Bophelo ba Hae, 'me Bo u tsose, bo u tsose khahlehong ea lefatše, ho fihlela lintho tsohle tsa lefatše li shoele. "Ea ratang lefatše, kapa lintho tsa lefatše, lerato la Molimo ha le eo ho eena." U ke ke ua kenya bophelo ba mokopu sefateng sa morara, 'me ua hlalisa morara. Le a bona? Hae ba u le oa Kreste, u rata lintho tsa Kreste. U tlatsitsoe ka Moea. U a . . . Eena ke Morara; lona le makala. Ere A u amohele hoseng hona, joaloka ha A entse ho mosali oa Samaria, le ho beha bophelo ba hau ka ho Bophelo ba Hae, le ho u fetola sebopuo se secha.

Re sa inamisa lihlooho tsa rona motsotso feela.

120 Pele ho thapelo, na ba teng ba ka phahamisang matsoho a bona, ho re, "Nthapelle, moena. Ke batla ho hokahana le Kreste hakana." Molimo a hlohonolofatse pelo ea hau. Oh, hoo ho a babatseha. "Ke batla ho hokahana, le Kreste hakana, ho fihlela bophelo ba ka bo khanya bakeng sa Hae. Nkute litšabong ('na) tsa ka tsohle, le lipelaelong, le litsietsing, le litumeloana. 'Me o nteme ka ho Eena, hoseng hona, moo nka bang le khotso e kang ea noka. Ke tšohile haholo. Ha ke tsebe moo ke eang. Ha ke tsebe kamoo nka emang kateng. Mpehe mono."

121 Joale re sa inamisitse lihlooho tsa rona, lona ba ka khonang, ba phahamisitseng matsoho a lona, na le ka ema ka maoto a lona, bakeng sa lentsoe la thapelo feela? Feela . . . Re tla u rapella, hona moo u leng teng. Hobane, re na le . . . Ema hantle ka maoto a hau joale, re tle re rapele.

122 [Sekheo lebanteng—Mohl.] . . . ho tlosa ho bona, pherekano eohle. [Sekheo lebanteng.] . . . ho ikopanya le bokhopo ba lona; ho tsamaea Leseling le lecha, ho tloha letsatsing lena ho ea pele. Aba sena, Morena.

123 U itse, "Kopang, 'me le tla fuoa. Batlang, 'me le tla fumana. Kokotang, 'me le tla buleloa." Joale baa kokota. Kea kopa. Ba ke ba e amohele, Morena. Ha letsatsi lena le fetole maphelo a bona hakaale, ho fihlela ho se pelaelo e 'ngoe kelellong ea bona. 'Me ba ke ba tle Hae ho Uena, ka Letsatsi leo.

124 Ba ile ba ema, Morena, hoseng hona. Ba emela Uena joale, ka pel'a batho ba ha'bo bona. U itse, "Ea tlang ho etsa joalo, Ke tla mo emela pel'a Molimo le Mangeloi a halalelang. Empa ekareha a hlajoa ke lihlolong ka 'Na, joale, ka Tsatsi leo, Ke tla hlajoa ke lihlolong ka eena." Morena, ha ba hlabjoe ke lihlolong, hoseng hona. Ba eme. Joale, U hlile u boloka Lentsoe la Hau. Ba tlatse ka Moea oa Hau, le ho ba fa bophelo ba tšebeletso, hore, lefatšeng le tlang ho tla, ba tle ba thabele Boteng bo sa hloleheng ba Morena Jesu.

Ho tloha letsatsing lena, ho ea pele, re ba nehela ho Uena, ka Lebitso la Jesu. Amen.

¹²⁵ Molimo a le hlohonolofatse. Motho e mong ea haufi le bona a ba tsukutle ka letsoho, ea haufi le bona.

Ho na le Seliba . . .

¹²⁶ Joale molaetsa o fetile, joale khumamelang Morena, le ka batla le koala mahlo a lona feela.

. . . Mali,
Montsoe ho ea Emmanuele . . . (Eo e ne e le
Molimo, Emmanuele.)
'Me ba'libe, (ba sa lumeleng) ba qoelang
tlas'a . . .

Akofa, matha, tloo.

. . . tlas'a . . .
Ba lahla sekoli sohle sa molato.
Lahla . . .

¹²⁷ Khumamelang Eena feela joale ka Moea. Lokolla pelo ea hau feela. Ha ke tsotelle hore u setho sa kereke efe. Feela, ka pelong ea hau, "Kea U leboha, Molimo o ratehang."

'Me ba'libe . . . tlas'a leqhubu leo,
. . . molato oa bona . . .

¹²⁸ Joale ke batla le phahamise letsoho la lona, lona Bakreste, joale, balumeli, 'me le bine ena le 'na.

Esale ka tumelo ke bone molatsoana oo
O fepeloang ke maqeba a Hau,

E seng tumeloana joale, hopolang.

Lerato le lopollang e bile lepetjo la ka,
'Me e tla ba lona ho fihlela ke shoele.
'Me e tla ba lona ho fihlela ke shoele,
'Me e tla . . . (Lona e tla ba la ka . . .) . . . ke
shoele;
Le lopollang . . . (E seng mosomi, empa lerato le
lopollang.) . . . e bile lepetjo la ka,
'Me e tla ba lona ho fihlela ke shoele.

¹²⁹ Na u hlile u tiile ka seo, ho Eena? E reng, "Amen." [Phutheho e re, "Amen."—Mohl.] A ho be joalo. *Tumelo Ea Ka E Lelala Ho Uena.*

¹³⁰ Ba bakae ba kulang le ba hlokang, hoseng hona? Ka mor'a ntho ea moea, u hloka thuso ea nama. Phahamisa letsoho la hau, re tle re u bone. "Ke mohloki, Moena Branham. Ke—ke mona. Kea kula. Ke—ha ke khone ho fola. Ke lekile. Ke tsamaile ngaka. Ke entse tsohle tseo ke tsebileng ho li etsa, empa ha ke khone feela, ho bonahala joalo. Empa ke lumela hoba Molimo o tla mpholisa." U lumela seo? Ke tšepiso ea Hae eo.

¹³¹ Joale, na u lenngoe pel'a linoka tsa Metsi? Metsi afe? Kreste eo ea teiloeng, joaloka metsi a kollang lefikeng ho pholosa batho ba timetsoang ke lefu, Kreste o teiloe e le hore 'meleng oa Hae ho tsoe Moea o Halalelang, hore batho ba timelang ba se ke ba shoa ba mpe ba be le Bophelo Bosafeleng. Na u . . . Ho na le lintho tse ngata tse fapaneng.

¹³² Molimo o tšepisa ho folisa. "O hlabetsoe makhopo a rona, a tetekooa ka baka la litlolo tsa rona; kotlo e re tlišetsang khotso e Mo oetse holimo; re folisitsoe ka maqeba a Hae." Linoka, linoka tsa Metsi a le mang, Moea o Halalelang.

¹³³ "Ba pele, bona, ke baapostola, baprofeta, baruti, baevangeli, balisa," linoka tsa Metsi a le mang.

¹³⁴ "Lineo li fapane li le ngata. Ba bang ba biletsoa boporofeta. Ba bang ba biletsoa, ho sebetsa neo ea pholiso. Ba bang ba na le bohlae. Ba bang ba na le tsebo, ka 'ona Moea oo. Ba bang ba bua ka lipuo. Ba bang ba fetola. Bohle ka Moea o le mong," Bakorinthe ba Pele 12. Ke eng? Linoka, linoka tsa metsi a mangata, metsi a mangata.

¹³⁵ Linōka tse ngata tsa Metsi a le mang, Moea o Halalelang o aba lineo tse ngata le mahlohonolo ho tsoa hohle. O tliša lineo tse enneng, hape, lineo tsa pholiso, lineo tsa poloko, lineo tsa Moea o Halalelang ho sebetsa kerekeng ea lona le har'a batho. Linoka! Le thabo e kang noka le sehla sa selemo. E ntle hakakang!

Tumelo ea ka e lelala ho Uena,
 Uena Konyana ea Kalvari,
 Moloki ea Khethehileng;
 Nkutloe joale ha ke rapela,
 Tlosa sebe sohle sa ka,
 Oh ho tloha kajeno
 Ka botlalo ke be . . .

¹³⁶ Joale, Morena, eo ke thapelo ea rona. Ha re ka ke ra potlaka. Ena ke sabatha. Lena ke letsatsi leo U le entseng. Re lokela ho U khumamela letsatsi lohle. "Letsatsi lohle le bosiu bohle," seroki se boletse, "Mangeloi a nkalositse." Joale rea utloa hore A haufi.

¹³⁷ Ntate Molimo, ke buile taba e thata haholo. Empa ha kea e etsa . . . Lekola pelo ea ka, Morena. Haeba ke e entse ka lonya, joale u ntšoarele. Empa ke e entse ka baka la lerato ho lekala la Hau, Morara oa Hau. Ke a rapela, Morena, haeba ba bang ba le teng mona ba ikhomahantseng le liphutheho tse kholo tsa bolumeli, hopolang . . . Ha ke leke ho ba kopa ho tsoa nthong eo. Ke ba kopa feela ho se katelloe fatše le tumeloana ea bona, empa ho tla ho Uena, le ho lokolloa le ho hlaoleloa, le Moea o tšolohela ka hare. Ke moo kereke ea bona e tlang ho fetoha kereke e molengoana, kereke ea moea, eo U e tlelang, e seng nang letheba kapa letsika, e hlatsoitsoeng Maling a Konyana. Lefatše lena la hlalefo, kajeno, Ntate, le suthetse hole le seo. Ba batla matšoele a maholo le likereke tse kholo, tse kang morara o hlaha oa naheng.

Empa, Morena, rona—re tiisetsa tholoana eo e monate, tholoana eo ea Moea, e tlisang monate moeng oa rona.

¹³⁸ Rea kopa joale hore U hlohonolofatse batho bana ba kulang ba tlang ho rapelloa. Morena, na nka U kopa hang hape, na U ka halaletsa lekala lena le se nang tokelo, ka Mali a Hau? Hore Moea oa Hau o tle o phallele ka ho lona, ho bonahatsa Molimo o phelang, hore U sa le Molimo o buileng le mosali selibeng. Ho ke ho be joalo, batho ba tle ba hloke pherekano, ba tle ba bone moo Moea oa Molimo o leng teng, o ka pelong ea molumeli, e seng kerekeng e itseng, empa pelong ea molumeli. Aba sena, Ntate. Ke tla U emela joale, hore U tle u Iponahatse, joalokaha U ipontšitse matsatsing a boholo. Joaloka ha U Iponahalitse ka Jesu, Ea re shoetseng hore re tle re hloeke, hore 'ona Moea o neng o le ka ho Eena o tle o phalle ka rona, o hlahise liphetho tse tšoanang. Aba sena, Ntate. Hoba ke laetsa lintho tsohle ho Uena, ka Lebitso le ratehang la Mora oa Hau, Jesu. Amen.

Ke se ke ka lelera le ka mohla
Ho tloha ho Uena le ka mohla.

¹³⁹ Ho lokile, Teddy, *Lumela Feela*. Joale ba bakae ka mona . . . ? Billy o itse o abile litlankana tsa thapelo.

¹⁴⁰ Joale esale, re le ka kerekeng, ho hatellano, ke ho nka feela le ho kopa baeti bohle mahareng a rona ho ema, 'me a Moea o Halalelang o tsoele har'a batho bao le ho ba senola ka mokhoa oo. Re entseng seo, hangata. Joale, livekeng tse 'maloa tse fetileng, motho o itse, "Empa batho ba thatafalloa ho utlosisa seo. Empa ba batla mola oa thapelo." Kahoo re . . . Ba bakae ba neng ba le mona mehlang eo Moea o Halalelang o neng o haola holim'a letšoele le ho qotsa motho e mong har'a letšoele? Ehlile.

¹⁴¹ Joale, ke boleletse Billy ho aba likarete, re tle re khone ho bitsa, ka lihlopha, le ho ba rapella, le a bona, ho e qeta.

¹⁴² Kahoo joale, 'me hang ka morao ho mona, ba tla tšoara tšebeliso ea kolobetso ea ba lakatsang ho kolobetsoa. Re tla le fa sebaka, nako, metsotsong e 'maloa feela.

¹⁴³ Pele, re buile ka sena. Re buile ka Morara ona, lefa lena la Molimo. Joale, haeba hoo e le 'nete, joale haeba re hlile re le lekala le reriloeng pele ho ba Morara oo, joale 'ona Moea o Halalelang oo o lokela ho haola ka rona. 'Me ha O etsa joalo, o tla etsa ntho e tšoanang le eo O e entseng ka Eena, hoba Eena ke Morara. Rona re makala. 'Me haeba . . . Bophelo bo ka har'a sefate sa morara bo loketse ho ba lekaleng, ho phelisa lekala. Haeba le hlahisa phapang ho seo Morara oo o se hlahisitseng, joale ke sefate sa morara se fosahetseng. Ke seo ke lelang ho se bua. Eka khona ebe Bophelo bo tšoanang.

¹⁴⁴ Joale, ke bomang ba nang le likarete tsa thapelo? Phahamisa letsoho la hau! . . . ? . . . Ho lokile. E qala kae, ho tloha ho 'ngoe ho isa ho mashome a mahlano, kapa 'ngoe ho isa ho lekholo? Kapa, ke ba bakae ba tsebang? Na—ke likarete tsa thapelo pele. . . Ema.

Joale, ke mang ea nkileng nomoro ea pele? Na ho na le karete ea thapelo ea nomoro ea pele mona? Na e teng? Be, e qalile kae, joale, mashome a mahlano? [Moena e mong o re, “E ’ngoe ho ea ho mashome a mahlano.”—Mohl.] Oh, oh, mona, ’ngoe ho isa ho mashome a mahlano. Ho lokile.

Ema hantle mono, le a bona, nomoro ea pele.

Palo ea bobeli. Palo ea bobeli. Ho lokile, ema hantle mono.

¹⁴⁵ Palo ea boraro, karete ea thapelo ea tharo. E teng ka mohahong? Na ba khona ho ema? Ke kopa tsoarelo. Ba li fumana, hohle. Palo ea tharo, na u ka tla koano, mofumahali?

¹⁴⁶ Palo ea ’nè. Ke mang ea nang le karete ea thapelo ea nomoro ea ’nè? E-ea hantle mono, mofumahali. Palo ea ’nè, na ke bone eo? Ke eona eo. . . Ke mang ea nkileng palo ea ’nè? Ho lokile.

Palo ea hlano, palo ea tšelela, supa, robeli. Robeli, palo ea robeli.

¹⁴⁷ Robong. Joale emang mona. Palo ea robeli, robong. Batho ba bang ba tsoile, kahoo ho ka etsahala, hore ebe e ne e le e mong. Palo ea robong.

¹⁴⁸ Palo ea leshome, palo ea leshome le motso o mong, palo ea leshome le metso e ’meli, leshome le metso e meraro, leshome le metso e mene, leshome le metso e mehlano.

¹⁴⁹ Whew! Ke haelloa ke tse ’nè kapa tse hlano. Kahoo re tla fihla ho eona. Mohlomong ba tsoile. Haeba mang a kena, Moena Taylor, u shebe ’me u bone haeba ba tsoere likarete tsa thapelo mono. Ba kenye moleng, ka kopo. Le haeba ba tsoile le ka morao mono kae-kae.

¹⁵⁰ Joale ke tla kopa hlomphe e felletseng, ’me le apare hlomphe feela e kaalo.

¹⁵¹ Ba bakae ka mona ba kulang ’me ba se na setlankana sa thapelo? Na u ka phahamisa matsoho a hau ’me oa re, “Ke a kula ’me ke a hloka ’me ha ke na karete ea thapelo.” Ho lokile. Joale sheba ka nqa ena ’me u a lumele. Ho lokile.

Joale, Moena Teddy, butle haholo.

¹⁵² Joale, haeba batho bana ba sa kene, re ka tsoelapele ka mola oa thapelo, nqa e ’ngoe hape. Empa re tla ema, ho ba fa sebaka.

¹⁵³ Joale, nako eo ntho e ’ngoe le e ’ngoe eo Ke e boletseng e tlamehang ho netefatsoa e lokile kapa e fosahetse ke ena. Na Bible ha e re, “Lekang lintho tsohle. Le tiisetse ho molemo”? Joale haeba. . . Jesu, e leng Morara oa Molimo, o ithatetseng ka Terone ea Molimo, a hlahiselitse Kereke Bophelo Bosafeleng, ’me rona re le makala a Morara oo. Le a bona?

¹⁵⁴ O lemile Iseraele Palestina. Ha e a sebetsa. Ba fetoha e. . . Litholoana tsa bona li ile tsa pona joaloka bolo e pheulehang. E hola bosiu bole bong, ’me ea pona, ho bontša e ne e sa nepahala. E ne e se na “Bosafeleng.”

155 Empa litholoana tse ka ho Kreste Jesu li tla hlola kamehla le mehla. Li tlameha joalo. 'Me haeba Moea oa Hae, o neng o le holim'a Hae, o ntse o phela le kajeno, ha se mokhatlo oa bolumeli o pheulehang. Ke Molimo o phelang o hlhisang bona Bophelo boo A bo entseng. Na le lumela seo?

156 Joale, e ke ke ea pheuleha feela le ho re, "Oh, lintho tseo li ne li baletsoe letsatsi le leng. Oh, ke ntho e kang *ena*." Haeba ho le joalo, u tla thefuloa, hoseng hona.

157 Ke ntho ea sebele. Ke Bophelo ba sebele. Ke Kreste oa sebele. Joale u be le tumelo 'me u lumele, 'me u se ke oa belaela le hanyenyane feela haese hoba Molimo o teng ho folisa bakuli.

158 Joale, lona ba se nang karete ea thapelo, ha u ka rapela oa lumela feela ka pelo ea hau eohle, ebe—ebe Molimo, Molimo o tla le nea lintho tseo le li kopang. Ke ba bakae ba lumelang seo hajoale?

159 Joale ke batla ho le botsa taba e 'ngoe hape. Haeba Molimo o ka etsa tse joalo . . . Joale ha re boneng haeba motho e a le teng moleng ona eo ke mo tsebang. Ha ho motho eo ke mo tsebang.

160 E, Khaitsetli Logston. Na ha se uena Khaitsetli Logston? Na u eena? [Khaitsetli Logston o re, "Ha ke moleng."—Mohl.] Oh, ha u a kena moleng. Ke—ke kopa tsoarelo.

161 Ke kholoa batho bao bohle e le bao ke sa ba tsebang. Na hoo—na hoo ho joalo? Ha ke tsebe letho ka lona. Phahamisang matsoho a lona holimo haeba ho le joalo. Mono, hoo ho etsahetse joang? Hore seo se etsahetse joang, ka ho theoha feela le ho aba letoto lohle la likarete tsa thapelo, mang ea li batlang mona, esita le ho fihla ho ba bang mohlomong ba . . . ha ba—ha ba eo? Seo se etsahetse joang? Mola o felletseng mono, ha ho motho mona joale ka tabernakeleng. Ha ke lumele hore seo se kile sa etsahala pele.

162 Joale lona ba se nang karete ea thapelo. Mosali e mong a fohla letšoele, khetlo le leng, 'me a ama qola ea seaparo sa Hae, hoba o itse, "Kea lumela. Ho sa tsotelle seo moprista a se bolelang, kapa mang. Ke a Mo lumela. Ha nka ama seaparo sa Hae, ke tla fola." Na le tseba pale? 'Me a ama seaparo sa Hae. 'Me A retelohela ho eena 'me a 'molella phallo ea hae ea mali e emisitse. Tumelo ea hae e ne e mo folisitse. Le tseba seo e le 'Nete?

163 Be, ke Moprista e Moholo ea tsoanang hoseng hona. O Teroneng ea Molimo. Lentsoe la Hae, ao ke Makala a Hae, Teroneng la Molimo le hokantsoe Teroneng ea Molimo pele lefatše le theoa. Le a e lumela? Le hlhisitse Bophelo, Krete Jesu. Ka Bophelo boo, ho kenya makaleng, bo tlisa Bophelo bo tsoanang le Bo tsoang Teroneng. Na ho joalo? Ka hona O lutse, boemo ba Hae ba metso kajeno, o ka letsohong le letona la Boholo bo Leholimong, ho hlhisisa Bophelo bo tsoanang ka Kereke ea Hae. Ke Moprista ea Phahameng ea ka angoang ke maikutlo a mefokolo ea rōna. Na hoo ke 'nete, na ha ho joalo? Joale le lumela seo ka pelo ea lona eohle.

164 Haeba A etsa sena, ke ba bakae ba lona ba kulang kantle mono ba tla e amohela? Kaofela ha lona? Joale, Teddy . . .

165 Joale mosali ke enoa o eme, o ne a phahamisitse letsoho feela hore ke ne ke sa mo tsebe. 'Me Molimo o tseba seo, ho ea kamoo ke tsebang, ha ke eso 'mone pele.

166 Mohlomong o tsoa le motseng ona. Ha ke tsebe. Ha ke sa tseba le karolo ea 'ngoe-tharong ea batho. Batho ba bacha ba kene. Ke ne ke tloaetse ho theohela totopong, ke—ke ne ke tseba bohle. Joale ha ke tsebe motho, ho batla ho le joalo, hoba e sa tsoa kena.

167 Ha ke tsebe mosali eo. Ha a ntsebe. Empa ekareha Bophelo bo neng bo le ka har'a Morara oo, bo tšepisitseng hobane lekala le tla hlahisa mocha o tsoanang le o . . . bona Bophelo boo Morara o bo tlisitseng. "Ea lumelang ho 'Na, mesebetsi eo Ke e etsang o tla e etsa le eena." Na hoo ke Lengolo? Santa Johanne 14:8. Ho lokile.

168 Joale, haeba mosebetsi oo A o entseng, ho bua le mosali selibeng le ho 'molella ntho e neng e le ntho e kubutuoeng bophelong ba hae; ekareha ha 'ona Moea o Halalelang oo, hoseng hona, o ka sebetsa ka kereke mona, le ho bua ka 'na, le ho bolella mosali enoa ntho eo a e tletseng mona, kapa ntho e hlahileng bophelong ba hae, kapa ntho eo a tsebang ke sa tsebe letho ka eona. Hobane, haeba ke sa mo tsebe, be, ke—ha ke tsebe letho ka eena. O eme mona feela.

169 Empa ekareha Moea o Halalelang oo o aba seo, o sa tlaile. Lentsoe la Molimo ke lena, le e tšepisitse. Ke rona bana re le babeli, re re, bobeli ba rona, "Ha re eso tsebane, ha re eso bonane le ka mohla." Ha Moea o Halalelang o ka senola seo, joale, bona Bophelo bo neng bo le lekaleng leo bo ntse bo phela, kapa sefateng sa Morara, ke rialo, ho futha bo phalla ka lekala. A Morena Molimo a e abe.

170 Joale, ka Lebitso la Jesu Kreste, ke beha moea o mong le o mong ka mona tlas'a taolo ea ka, bakeng sa 'Muso oa Molimo. Joale, joale aparang hlomphe ea sebele, e mong le e mong.

171 Re kopana khetlo la rona la pele, monna le mosali, ntho e kang ea ka Lengolong. Molimo o lumella sena, mohlomong, hore batho, ka Letsatsi la Kahlolo, ba tle ba tsebe, ba hloke boitatolo. E mong ha a ka tloha hoseng hona, a sa lengoa ka ho Kreste, a sa tsebe molemo oa Hae le mohau oa Hae; e le sieo mono, a ka ba le monyetla o mosesaane haholo, ha nka nahana, Letsatsing la Kahlolo. Holim'a Lentsoe le reriloe, 'me haeba Moea oa Hae . . .

172 Le a bona, ho na le ntho e le 'ngoe, ho rera ntho e 'ngoe. Haeba E le Molimo oa nalane, joale ke seo A se entseng nalaneng. Empa haeba E le Morara ka 'nete, 'me rona re le makala, joale lekala ke karolo hakaalo feela. Bophelo bo leng ka har'a Morara bo ntse bo futha bo chalametsa lekaleng, le a bona, ka hona le tla tlameha

ho hlahisa ntho e tsoanang. O e tšepisitse. “Ea lumelang ho 'Na, mesebetsi eo Ke e etsang o tla e etsa le eena.”

173 Joale, ha u kula, 'me, seo—seo ha ke se tsebe. Empa haeba u kula, nke ke ka u folisa, hobane O se a entse hoo.

174 Empa ho ka etsahala hore Boteng ba Hae mona bo etse hore u utloisise hantle hore O teng mona. Joale hoo ho tla phahamisa tumelo ea hau ho e amohela. Le a bona? E tla etsetsa bamameli joalo. Seo se neng se ka se etsetsa mosali enoa, se ne se ka se etsetsa e mong le e mong oa lona. Joale lumelang seo feela.

175 Hobane, “O hlabetsoe makhopo a rona. Re folisitsoe ka maqeba a Hae.” Re entsoe joalo. Khale koana, lilemo tse likete tse peli tse fetileng, pholoho le pholiso li fihlile mohlang oo.

176 Joale u re, “U buela eng, Moena Branham?” Ke bona seo Moea o Halalelang o tlang ho se bua. Ha ke mo tsebe.

177 'Me sebaka se boima ka ho fetisisa seo nkileng ka tsoara kopano ho sona, ke hona mona. Hobane, ke seo Krete a se boletseng, “Moporofeta naheng ea ha'bo, har'a sechaba sa ha'bo.” Le a e bona? “O ile a kena ho ba Ha'bo, 'me lintho tse ngata A sitoa ho li etsa.” A tloha a ikela. Joale, ha se ka lebaka la sehlotšoana sena se mona. Ha se eona. Kereke ea ka, ba a nthata le ho ntumela. Empa ke elemente e kantle. 'Me Lentsoe la Molimo le boletse. Le rialo.

178 Empa ke—ke ema motsotso feela, ho bona haeba Moea oa Molimo o tla ntlotsoa ho fumana. Joale, ke moea 'me hape ke nama. Ka letsatsi le leng moea o tla tloha, 'me nama e tla bola. Moea o ea ho Molimo Ea o abileng. Moea ke ona, hape, o eme mona, empa o bapisitsoe ka 'meleng oa nama. Joale haeba meea ena e hoketsoe Morareng oo, e tla hlahisa . . .

179 E ne e le eng? Mohla moea o neng o fihla ka pel'a Jesu, phoso e le teng ka ona, Moea oo o neng o ahile ka ho Eena o e senotse. Le a bona? 'Me mosali, eitseha O e senola, a e amohela, 'me a re, “U loketse u be u le Messia. Rea tseba hore mohla A tlang, o tla re bolella lintho tsena.”

180 Petrose, ha a fihla, oh, a batla a ipotsa hore ebe Andrease o ne a bua ka eng. A re, “Ke Messia.” 'Me ha a fihla ho Eena, A re, “Lebitso la hau U Simone. U mora oa Jonase.” Eaba seo se mo lekane. Le a bona? O tsebile hore O ne a sa tsebe hore ke mang.

181 Empa O a tseba hore u mang. Ha ke tsebe hore u mang, empa O a tseba. Ha ke tsebe letho ka uena, empa O a tseba.

Joale, Ke ona. Joale Moea oa Molimo o teng mona aletareng.

182 Joale, ka hona, U tsebile se seng se etsahetse. U mona bakeng sa boemo ba methapo. Ke hantle. U jeoa athritisi, hape. Seo ke 'nete. [Khaitseli o re, “Ho joalo.”—Mohl.] U a lumela? Ha ke eso bone mosali eo bophelong ba ka.

183 Joale, na hoo ha ho monate, hoo ehlile. . . Ke a tseba u tlamehile ho E utloa. Ke E shebile. Le a bona? Ho joaloka ho haptjoa hamonate.

184 Che, ho bona monna a hlaha holimo mona. Ke ngoan'eno. Esale u ntse u mo rapella haholo. Ke bona monna e mocha, e mocha. E tlameha ebe e le moreri. Ke mora oa hau. O na le bothata ba moea. U tsoa hole, ho fihla mona. U tsoa Boroa, o tla ka tsela ena. U tsoa Tennessee. U Mof. Tabor. Khutlela morao. U fumane kopopo ea hau. Molimo a u fe eona. Haeba. . .

185 Joale, ha ke eso ame mosali eo le ka mohla. Moea o Halalelang o entse hoo. Joale, ho a tsoana. Na e etsahetse ka tsoana le ka Bibeleng? Mosali eo o itse, "U loketse u be u le Messia." Joale, hoo ha ho bolele hore 'na ke Messia. Hoo ho bolela hore Moea oa Messia o teng mona. Re banna le basali feela. Ke Moea oa Messia.

186 Joale, u E amohela, u fotholoe, ho se lumeleng hoo ha khale, le ho lenngoa pel'a Hae hantle, u a bona, joale. Ema u re, "Morena Jesu, U Mora oa Molimo, Moprasta e Moholo. Moena Branham o sa tsoa re U lutse Boreneng Holimo. U ne u retsoe pele lefatše le theoa, U ile oa hlabjoa, ho tlisa liphetho tsena; hore, 'na, molumeli oa halofo ea tsela, ea lekang ho lumela, ke tile ke etsoe ea lumelang ka botlalo. Ntese ke ame seaparo sa Hau. E re a bule le 'na." Uena ea. . .

187 Lona ba mametseng, le bule ntho eona eo. "Hoba haeba U sa le Eena maobane, kajeno, le kamehla, U—U—U ntumelle ho U ama ka tumelo ea ka, ho behella ka thoko mehopolo eohle ea ho se lumele. E re ke U ame."

188 Kea lumela u phahamisitse letsoho la hau, hape, hore re ne re sa tsebane. [Khaitsele o re, "Ke entse."—Mohl.] Ho lokile. Joale, ha Morena Jesu a ka ntšenoletsa, ntho e 'ngoe e—e phoso ka uena, kapa ho hong ka mokhoa, na u ka lumela seo, hore thapo ena ea Bophelo, hore Kereke e hlile e lemiloa ka ho Molimo. Jesu o itse, "Ka tsatsi leo, le tla tseba hobane Ke ka ho Ntate, Ntate o ka ho 'Na; le 'Na ka ho lona, le lona ka ho 'Na." Le a bona? Ke Bophelo boo ba Molimo bo phallang hantle ka Lebitso la Jesu Krete, hantle ho theohela ka har'a Kereke, le a bona, ho re etsa bang. Rona re makala. Re baemeli ba Hae.

189 Ha u lumela seo, bothata boo ba maoto bo tla u tlohela. Na u ka e lumela? [Khaitsele o re, "Kea lumela. Kea lumela."—Mohl.] Ho lokile. U ka e fumana. 'Me monna oa hau mono o tla folisoa, le eena. U a lumela o ne a tla etsoa joalo, ka hernia? ["Ee."] Uena, monghali, u lumela hore u tla fola? [Moena o re, "Amen."] Uh-huh. U etsa joalo? Ho na le morali, hape. O na le moea oa bothata bo itseng ba moea. U tsoa Leboea, ho tla ka tsela ena. U theoha ka 'milakholo. U tsoa Austin. Lebitso la hau ke Mof. White. Hoo ke HO RIALO MORENA. ["Oh!"] Khutlela morao le ho lumela joale, 'me u fole, 'me o hlaphoheloe. Molimo a u nehe takatso ea pelo ea hau.

“Ha u ka lumela, tsohle li ka etsoa.”

¹⁹⁰ Bophelo ba Bophelo ba Krete, ka lekaleng. Lekala ha se Branham Tabernacle. Lekala ha se William Branham. Lekala ke mang ea tla fotholoha ho se lumeleng ha hau, le ho hlongoa ka ho Eena.

¹⁹¹ Ke lumela u phahamisitse letsoho la hau hore, hape, re ne re sa tsebane. Ha ke u tsebe. Molimo o a u tseba. Ha u a tlela uena mona. Ke bakeng sa ngoana. Ke bona Leseli le lopaletse holim’a ngoana. Ha Molimo o ka ntšenoletsa se phoso ka ngoana oa hau, na u tla lumela hoba ke moporofeta oa Hae, le ho lumela hore ke u bolella ’nete? U ka etsa joalo. Ngoana o na le bothata ba pelo. Ke ntho e kang valve, ngaka e boletse. E hlahlobiloe. O batla ho mo romela kliniking hang-hang. Ke hantle. U tsoa mona Jeffersonville, mona seterateng, Seterateng sa Fulton. Empa hoo ho lokile. ’Me lebitso la hau o Mof. Burkhart, Irene Burkhart. Khutlela morao, ’me u lumele bakeng sa lese, le tla fola.

¹⁹² “Ha u ka lumela, tsohle li ka etsoa.” Ha u ka lumela feela!

¹⁹³ Mosali enoa ea lutseng mona ka bothata boo ba methapo. Ee. E lebale. U ea hae, fola joale.

“Ha u ka lumela!”

¹⁹⁴ U phahamisitse letsoho la hau *tjena*, u na le bothata ba mokokotlo. U lumela hore Molimo o tla u folisa? U a lumela, ho e amohela? Ke moo u ka khutlela haeng ’me u fole. Jesu Krete o a u folisa.

¹⁹⁵ Ba hau ke liphio. Ka hona, tsoela pele, u fumane ea hau, le uena, monghali. Molimo a u hlohonolofatse.

Eba le tumelo ho Molimo. Se belaele.

¹⁹⁶ Mosali oa ’mala. Ho na le babeli ba bona. Hantle ka morao mono. Kotolana ’metsong, ’metsong. Lumela ka pelo ea hau eohle. U a e lumela, mofumahali? Ntho e kang bonnet joalo, e roetsoeng mono. U a lumela? Phahamisa letsoho la hau. Ho lokile. E-ea hae; e tla u tlohela.

¹⁹⁷ Ho na le mosali e mocha ho feta enoa. Ha ke u tsebe. Molimo o a u tseba. U a lumela A ka u folisa? [Khaitsetsi o re, “Ee.”—Mohl.] Be, khutlela New Albany, Mofn Pearl Allen, ’me u fole. Jesu Krete o u folisitse. U ka ikela, u ntse u e lumela, u ka fola.

¹⁹⁸ Eba le tumelo ho Molimo. U lumela ka pelo eohle ea hau? Joale, ha se. . . Oh, ho etsahala ntho e ’ngoe le e’ ngoe, koana holim’a. . . Ha feela u ka e lumela, motsolle!

¹⁹⁹ U phela joang, monghali? U lumela Jesu Krete Mora oa Molimo? U a lumela hore ke moporofeta oa Hae? [Moena o re, “Ke etsa joalo.”—Mohl.] U lumela seo ke tlang ho u bolella sona. U tla tseba haele ’nete kapa che. U lumela seo ke rerileng ka sona, hoseng hona, ke ’Nete? [“Ee.”] Le a lumela. Mona u tletse ntho e molemo. U mona ho tlosa tloaelo, eona, ke ho tsuba. Ke u bona u

e shebile, 'me u nyatsa ntho eo, le ho e suthisetsa hole le uena. Ke hantle. U se ke . . . haeba u . . . Mamela. U batlela mosali oa hau thapelo. O hlaseloa ke melikalikoane. Mongh. Carlock, khutlela Owensboro, Kentucky, moo u tsoang teng. U se ke ua tsoara e 'ngoe. Jesu Kreste o a u pholosa. E-ea, ka Lebitso la Morena, 'me u fole.

U a lumela na?

²⁰⁰ Joale shebang. Monna enoa ea tlang mona, beha letsoho la hau holim'a la ka feela, monghali, mona. Bothata ba hau ba mokokotlo bo felile. Khutlele feela morao mono, u ntse u leboha Molimo. Amen.

²⁰¹ U batla ho ea ja lijo tsa hau tsa mantsiboea? Bothata ba mala bo tla u tlohela ha u ka e lumela. Le a e lumela? u ka ikela. Rorisa Molimo feela, le ho re, "Kea U leboha, Morena."

²⁰² Ba bakae ba lumelang ka pelo ea lona eohle?

²⁰³ Molimo a u hlohonolofatse. Ka tsela eo, hape, u ka ikela oa rorisa Morena. Ho re, "Kea U leboha, Morena."

²⁰⁴ U na le bothata ba batho ba bangata kantle mona. Ke dinerefe, li etsa hore pelo ea hau e tsetsele, le bothata ba pelo. Ha u lumela ka pelo eohle ea hau!

²⁰⁵ Ka ntle mono, ba bakae ba nang le dinerefe tsa pelo le lintho? Joale phahamisang matsoho a lona *joalo*. Shebang mona. U ne u ka o bitsa joang le ka mohla? Le a bona?

²⁰⁶ U lumela ka pelo eohle ea hau? U etsa joalo, le uena? Ho lokile. E-ea 'me u fole ka Lebitso la Jesu Kreste. O se ke oa belaela le hanyenyane, empa lumela hoba seo u se boleletsoeng ke 'Nete. Lumela hore u folile. U tla fumana seo u se kopang.

²⁰⁷ Lona ba bang le etse joalo. Ke ba bakae hape ba lona kantle mona ba nang le eona? Ho lokile, monghali. Ke ba bakae kantle mono ba hlokang Molimo? Phahamisang matsoho a lona. Le ho re. . .

²⁰⁸ Shebang. Fumanang sena. Ha ke khone ho folisa motho. Ke motho. Hola Kreste a ne a eme mona, o ne a ke ke a folisa le a mong oa lona. O ralile lenaneo, 'me lenaneo leo ke hore u lumela hore O u shoetse, u ka folisoa ka seo. Ke eona feela tsela. Ke pholiso ea tumelo. Tumelo! Lumela hore Kreste o lefile theko bakeng sa hau. Ke ba bakae ba utloisisang seo joale? Ho lokile. Ba bakae ba amohelang seo? Ho lokile.

²⁰⁹ Re sa rapela, behanang matsoho holimo. Behanang matsoho holimo, e mong le e mong a rapele.

²¹⁰ Joale u ka ea setulong sa hau, khaitseli. Molimo a u hlohonolofatse joale. U pheliso. . . ? . . . Ee. Ke hantle. Ke boemo ba methapo, empa bo tla—bo tla u tlohela. Theohela tlase mono joale, u bone haeba hoo. . . Na u qala u ikutloa ka tsela e fapaneng, ha u joalo? Le a bona? Ehlile. U folile, u eme hantle

mona. Le hlokomela kamoo a theohileng setepisi kantle le hoo? Le a bona? 'Me joale u lokile. Joale u ka ea hae, u fole. Morena a u hlohonolofatse.

211 Joale le sa behane matsoho holimo. Le a bona, ha re na nako e ngata, e se e batla e le motšhare. 'Me ba na le tšebetso ea kolobetso, le joale.

212 Ruri, ruri, batho, Bophelo bo boholo ba Molimo, Moea o Halalelang o moholo O bontšitseng ka ho se fose hore O teng, ho bontša hore Bophelo bo tsoang Teroneng ea Molimo bo ntse bo futha makaleng, ho bontša Bophelo. Na u lumele seo? Ka hona, che, ha ke eso folise e mong oa batho bana ba nyolohang mona. Tumelo ea bona e entse hoo hobane ba ne ba boleletsoe ntho eo e leng 'nete. Haeba u ne u le teng mona, E ne e tla etsa ntho e tšoanang.

213 Joale ho lona kantle mono, O u senolela seo u se hlokanang. Joale re sa rapela, bohle 'moho, rapelang, le lumela hore lentsoe le leng le le leng ke 'nete, 'me le shebe se etsahalang. U tla fola. Joale le rapelle motho eo. U se ke oa ithapella. Rapella motho eo u mo beileng matsoho. E re motho eo a u rapelle. Ho rapellana. Bibe e bolela sena joale.

214 Eona Bibe e boletse, "Mesebetsi eo Ke e etsang le tla e etsa le lona," e boletse sena, "Mehlolo e tla tsamaea le ba lumelang ke eona ena. Ha ba bea matsoho a bona holim'a bakuli, ba tla fola." Joale, Molimo ea entseng tšepiso e le 'ngoe, 'me a e boloka, haeba u lenngoe ho eona, pel'a linoka tsa Metsi, A tliša Boteng bo bong le bo bong bo Halalelang ba Molimo, tšepiso e 'ngoe le e 'ngoe, hantle khokahanong ea hau. U sefate se hlomiloeng pel'a linoka tsa Metsi a le mang. Metsi ao a le mang ke Krete, Moea oa Hae o Halalelang. Ho na le pholiso. Ho na le Poloko. Thabo e teng. Ho na le mamello, bonolo, mosa, mamello. Mefuta eohle ea lineo e lutse hantle Lebitsong le le leng leo le bohlokoa. "Tsohle tseo le li kopang ho Ntate ka Lebitso la Ka, Ke tla li etsa."

215 Joale rapela ka Lebitso la Jesu, bakeng sa motho eo u mo beileng matsoho. Ke tla le rapella bohle, bakeng sa lona bohle. Ere Moea o Halalelang, o leng teng joale, o folise motho e mong le e mong.

216 Morena, re tla kopa hore mohau oa Hau o tsoele pele le rona. E mong le e mong o rapela ka tsela ea hae. Ba bone Moea oa Molimo o phelang o etsoa oa sebele joaloka ha O ne o le Galilea. Joaloka ha E etsahetse mohla Petrose a fihlang mono le bopong la Galelea, 'me Jesu a 'molella hoba e ne e le mang. 'Me hantle feela joaloka eitseha Nathanaele a fihla, 'me A 'molella moo a neng a le teng maoba. Hantle feela joaloka ha e ne e le khorong ea Samaria, kapa selibeng. Ka sebele batho ba ne ba ka re, "Ona ke Moea oa Molimo o phelang."

²¹⁷ Morena, aba tumelo le boteng ba kelello, le Boteng ba Moea o Halalelang, hore e mong le e mong, ha a rapela, a rapelle e mong, thapelo ea tumelo. Ke kopa joale, Morena, bakeng sa ba beaneng matsoho holimo, hore U tla ba fa tumelo e sa fetoheng, hona joale feela bakeng sa motho eo. 'Me, ehlile, seo se tla khutlela ho bona. Oh, ho ke ho be joalo! Morena Molimo, ho ke ho be joalo. Re ka ba tlisa, ka bonngoe, ho phatlalla le sethala, ka liphetho tse tsoanang; empa leha joalo ho tla nka tumelo, tumelo ka ho motho ka bonngoe, ho lumela Molimo. 'Me ho ngoliloe, "Mehlolo e tla tsamaea le ba lumelang ke eona ena. Ha ba bea matsoho a bona holim'a ba kulang, ba tla fola."

²¹⁸ Oho Morena, boloka tšepiso ea Hau hoseng hona, ho molumeli e mong le e mong. 'Me Moea o Halalelang o kene mebeleng ea batho bana ba kulang, le ho tlosa maloetse 'ohle le lipabo. Ho ke ho hlahe thasisetso e kana ho fihlela lipelo tsa batho bao li tloakisoa ke thabo, ba lumela hore Molimo o ba folisitse. Ba tlohe tabernakeleng ena, ba bina ba nyakaletse, 'me ba lumela hore Molimo o ba folisitse. E ka ba ka khutla ka letsatsi le leng, ba thabile, ba nyakaletse, ba ntse ba paka, kamoo makholo a ka pakang kajeno lefatšeng ka bophara, ka Matla a Hau a folisang. Thapelo ena re e hlahisa holim'a batho bana, re kopa hore ho be joalo, ka Lebitso la Jesu Krete Mora oa Molimo. Leseli la Molimo le ke le chabe 'me le folise bohle. Amen.

Nka khona, ke tla khona, kea lumela;
 Nka khona, ke tla khona, kea lumela;
 Nka khona, ke tla khona, kea lumela
 Jesu o a mpholisa joale.

Na u etsa joalo? Phahamisa letsoho la hau.

Nka khona, ke tla khona, kea lumela;
 Nka khona, ke tla khona, kea lumela;
 Nka khona, ke tla khona, kea lumela
 Jesu o a mpholisa joale.

[Sekheo lebanteng—Mohl.] . . . lumela seo.

²¹⁹ Ke ne ke etela matlu a batho, 'me ba ne ba pheha lijo tse monate tsa mantsiboea. Ho tlameha mpehela kopi ea metsi a chesang, le ho ntulisa fatše pel'a moronyana oa harese; lintho tsa mefuta eohle tse monate tafoleng. Ka letsatsi le leng ka re ho Morena, "Kea lumela. Kea lumela." Oh, khili! Ka theosa seterata ka mothamo oa ka oa pele oa lijo ka mpeng, ke ntse ke bina:


Nka khona, ke tla khona, kea lumela;

Li ne li leka ho nyoloha; ke li sutumelletsa morao.

Nka khona, ke tla khona, kea lumela;
 Nka khona, ke tla khona, kea lumela
 Jesu o a mpholisa joale.

²²⁰ Ee. Ke lilemo tse mashome a mabeli a metso e mehlano tse fetileng. E bile oa sebele ho 'na ho tloha mohlang oo. Ke e

leboha haholo feela. E be ntho e joalo le ho lona. Molimo a le hlohonolofatse.

²²¹ Joale ba tla tšoara tšebeletso ea kolobetso, metsotsong e 'maloa feela, ke a lumela; ee, ke hore, haeba ba bang mona ba tla kolobeletsoa Lebitsong la Morena Jesu Krete. Haeba batho ba joalo ba le teng, re tle tsebe haeba re qhalanya batho kapa—kapa ho ba tšoara hanyenyane, na u ka phahamisa matsoho a hau haeba motho a lokela ho kolobeletsoa Lebitsong la Morena Jesu? 'Ngoe, peli, tharo, 'nè. Ho lokile. Ha basali ba ka ea ka lehlakoreng lena *mona*, 'me banna ka *mona*, ho itlhophisa, ka kopo. Ha re ntse re bina hape, *Ke . . .* 

59-0920 Ho lema Sefate Sa Morara Le Ho Se Lema Hokae
Branham Tabernacle
Jeffersonville, Indiana U.S.A.

SOUTH SOTHO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlalisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org